



ARUBA

TA NOS PRIORIDAD

NOS VISION TA E **SOLUCION**

PROGRAMA DI GOBERNACION
2017 - 2021

HUNTO P'E CAMBIO
#SINMIEDO



MOVIMIENTO
ELECTORAL
DI PUEBLO

Cede di MEP Santa Cruz 74-D | TEL: 297 585 6917 | 5643211 | FACEBOOK: MEPofficial

NOS VISION TA E SOLUCION

“Nos cu ta forma parti di partido Movimiento Electoral di Pueblo ta kere firmemente cu e meta di tur accion publico mester ta pa logra e mayor bienestar di henter nos comunidad. Nos ta sigui kere cu firmesa den e compromiso cu nos sociedad mester sigura un nivel di bida digno pa cada ciudadano y brinda e posibilidadnan di mehoracion social mas husto, transparente y democratico. Pasobra Aruba ta nos prioridad”

CONTENIDO

	NOS VISION TA E SOLUCION	3
	CARTA DI EVELYN WEVER-CROES NA PUEBLO	4
	INTRODUCCION	5
1	MANEHO HUDICIAL Y NOS PRIORIDAD PA HACI ARUBA MAS SIGUR	7
2	MANEHO MIGRATORIO Y PRIORIDAD NA INTEGRACION	10
3	MANEHO ECONOMICO BAHA COSTO DI BIDA, CRECEMENTO ECONOMICO Y CREA CUPO DI TRABAJO	13
4	MEHORA CUIDO DEN AREA DI SALUD, NOS PRIORIDAD	19
5	NOS PRIORIDAD PA COMBATI ADICCION	23
6	MANEHO DIRIGI RIBA ENSEÑANSA Y EDUCACION DI CALIDAD	25
7	NOS PRIORIDAD PA DESAROLLO DEPORTE	29
8	MANEHO SOCIAL HUBENTUD/HENDE MUHER/ADULTO MAYOR	31
9	FINANSAS PUBLICO NOS PRIORIDAD PA ATENDE CU E CRISIS FINANCIERO	35
10	NOS PRIORIDAD PA DESAROLLO DI TURISMO	37
11	NOS PRIORIDAD PA UN MANEHO DI ENERGIA SOSTENIBEL	39
12	NOS PRIORIDAD PA INFRAESTRUCTURA Y MEDIO AMBIENTE	40
13	NOS PRIORIDAD PA UN TRANSPORTE Y COMUNICACION CONFIABEL	43
14	NOS PRIORIDAD PA ENGRANDECE NOS CULTURA	44
15	NOS PRIORIDAD PA UN BON RELACION DEN REINO Y COOPERACION INTERNACIONAL	45
16	NOS PRIORIDAD PA UN GOBERNACION MAS TRANSPARENTE	47



NOS VISION TA E **SOLUCION**

PROGRAMA DE GOBERNACION
2017 - 2021



Apreciabel conciudadano,

Nos ta para dilanti un escogencia importante den e eleccion di dia 22 di september venidero.

Nos tin e oportunidad pa scoge un gobernacion cu lo inspira decencia den politica, cu ta duna speransa pa un miho mañan y cu ta sirbi tur ciudadano.

Mester di extra atencion pa e gruponan vulnerabel y den peligro pa keda exclui. Tambe mester percura pa nos adelanto no ta pa awe so, pero tambe pa e proximo generacionnan.

P'esey adelanto mester ta duradero, cu atencion special na nos siguridad, costo di bida, cuido di salud, enseñansa, medio ambiente, finansas publico y economia duradero.

Ta bon conoci cu falta di transparencia y falta di bon gobernacion, esta corrupcion, semper lo resulta den pobreza den un pais. Nos ta convenci cu no por tin adelanto, si no tin un estado di derecho, un bon gobernacion y un democracia bibo di participacion.

Diabierna 22 di september 2017 nos tur hunto tin e oportunidad pa cambia e rumbo. Den e eleccion aki nos lo determina con nos ta laga nos pais pa nos yiunan y nan yiunan.

E eleccion aki lo determina si nos ta sigui den e mesun rumbo di inseguridad y criminalidad creciente, costo di bida halto, cuido di salud deficiente, calidad di enseñansa inferior, bancarota financiero, corrupcion gubernamental y desempleo, of si nos ta cambia e rumbo di e pais pa mas siguridad, pa miho cuido di salud, pa mas empleo, pa reduccion di costo di bida, pa enseñansa di calidad y pa un situacion financiero stabiel.

Partido MEP ta scoge pa cambia rumbo di e pais aki y pone e ser humano central atrobe. Nos ta invita bo pa forma parti di e cambio aki. Hunto nos ta bay bay p'e cambio den e rumbo den cual nos lo uni nos pais y utiliza tur talento cu tin na Aruba, pa asina crea un miho pais pa nos yiunan y nan yiunan.

Partido MEP ta cla pa traha cu boso pa un mihor Aruba y nos mester di boso sosten!

Hunto nos lo haci e diferencia.

Evelyn Wever-Croes
Lider di **MEP**



Ultimo añanan nos pais a pasa den sucesonan cu ta mina fundeshi di nos estado di derecho. Ademas nos ta ripara mas y mas cu cierto politiconan ta busca tur sorto di buraco den ley y reglanan vigente pa nan interes propio, ignorando asina tur regla skirbi y no-skirbi, norma y balornan di interes general.

Habitantenan di Aruba tin derecho riba un bon gobernacion. Esaki ta encera un bon maneho economico-financiero, un bon maneho di nos fondonan y propiedadnan publico di nos pais na un manera habri, transparente, responsabel y husto pa un y tur.

Esaki ta nifica respet pa e necesidadnan y libertadnan di nos ciudadanonan. Bon gobernacion ta encera tambe un gobierno cu ta actua consistente y pronosticabel. Maneho arbitrario of por ehempel atendemento arbitrario cu peticionnan pa permit no ta aceptabel.

Bon gobernacion ta encera alabes cu gobierno ta carga su responsabilidad y ta enforza leynan existente. Bon gobernacion ta un condicion primordial pa adelanto di nos pais.

Calidad di nos democracia y nos institutonan democratico ta depende di un structura transparente, basa riba proteccion di derecho humano, institutonan democratico y estado di derecho, "Accountability and Good Governance", eliminacion di corrupcion y discriminacion.

Pero mas cu tur cos, nos democracia ta depende di capacidad y integridad di e hendenan cu ta ocupa posicionnan clave den e structura y institutonan menciona.

Un pais cu hendenan capaz y integro ta un dimension masha importante den calidad di bida di e ciudadano.

Nos ta kere firmemente den un Gobernacion cu tin atencion pa e gruponan vulnerabel y den peliger pa keda exclui di e progreso di nos pais, pero alabes ta duna tur ciudadano espacio, libertad y oportunidad pa por desaroya su mes; cu ta stimula iniciativa propio, participacion den escogencianan democratico; cu ta empodera e ciudadano pa tuma rienda di su desaroyo y finalmente cu ta crea condicion y cuadro legal pa sostene un bon funcionamiento di nos sociedad.

Un democracia vibrante cu participacion critico di nos ciudadanía no ta un estorbo pa funcionamiento di gobernacion, pero ta mas bien e garantia pa gobernantenan responsabilisa nan mes pa nan actonan y funcionamiento den e aparato gubernamental.

Aruba tin necesidad di un cambio, un cambio pa mas siguridad di trabao, mas siguridad financiero, siguridad huridico y fisico. Un cambio pa mihor cuido di esnan mas vulnerabel, di nos grandinan y di salud en general.

Un cambio pa mas empleo y pa baha costo di bida. Nos pueblo ta desea un cambio di rumbo pa sali di e crisis moral cu nos ta aden.

E puntonan di prioridad cu partido MEP ta presenta, ta stipula e ruta pa yega na un bon gobernacion, crecemento economico den cual ta pone e ser humano central y mas empleo. Pa e motibo ey nos tin cu percura pa nos avancen ta inclusivo pa tur ciudadano.

E programa ta tene cuenta y implementa e puntonan di accion di e asina yama "Sustainable Development Goals" (SDG's) di "United Nations Organization", cual entre otro ta significa bringa pobreza, hamber, desigualdad y alabes ta promove sanidad y salud publico, calidad di educacion, calidad di trabao, crecemento economico sostenibel, innovacion den industria y infraestructura, energia sostenibel y pagabel pa e pueblo, mantencion di calidad di awa pa consumo, pero tambe di lama y asina yama "wetlands".

Nos meta ta pa crea un futuro cu perspectiva y oportunidad pa nos yiunan y e futuro generacionnan, den un pais cu por brinda mas bienestar na su pueblo, un miho proteccion na su ciudadanonan, un miho cuido di salud, un miho calidad di enseñansa y estabilidad financiero.

Lamentablemente den e ultimo 8 añanan Aruba a hala mas leu di e meta aki. Nos pais ta den un crisis social, un crisis di criminalidad, un crisis di salud, un crisis financiero y un crisis economico, specialmente den nos hogarnan.

Aruba ta den gara di proyectonan dudoso cu ta consecuencia di un maneho intransparente den e ultimo 8 añanan.

E desaroyo aki ta debi na e prioridadnan ekiboca di gobernacion di e ultimo 8 añanan, den cual a pone prioridad na proyectonan nobo di infraestructura, sin cu tabata tin fondonan reserva pa esaki, mientras pa un gran parti no a haci mantencion na e infraestructura existente y alaves a lubida e ser humano.

A pone prioridad na gastonan di luho y biahe di placer pa gobernantenan y nan amigonan, mientras a impone medidanan riba nos pueblo.

E gobernacion di e ultimo 8 añanan simplemente tabata na biahamento, conferencianan cu no a duna ningun fruto positivo pa nos pais, contractnan lucrativo pa coordinadornan y companianan di publicidad, a gasta alrededor di 100 milyon florin pa aña, cu ta monta na un total di 800 milyon durante nan gobernacion.

Mientras cu sector di educacion a bay atras, cuido pa nos grandinan a bay atras, criminalidad a crece enormemente, mita di tur e negoshinan den Caya Betico Croes a bati bancarota y corrupcion gubernamental a bira algo normal.

Partido Movimiento Electoral di Pueblo kier pone un punto final na e desaroyo negativo aki, pasobra nos ta convenci cu e pueblo aki merece miho.

Partido Movimiento Electoral di Pueblo ta mira e crisis cu Aruba ta aden na e momento aki como un oportunidad pa nos renoba nos comunidad y trece bek e norma y balornan cu nos a conoce como pais.

Awor nos tin e oportunidad pa por renoba nos vision como pais, unda nos kier bay como pais y con nos kier posiciona nos mes como nacion dentro di un mundo globaliza.

E historia di pais Aruba a demostra cu partido Movimiento Electoral di Pueblo tin e capacidad pa trece logronan grandi pa nos pais.

Pa nos saca Aruba for di e crisis, nos ta presenta un programa di crecemento y optimismo.

Un programa cu ta cambia prioridadnan di Gobierno y ta pone e ser humano central atrobe. Nos ciudadanonan merece miho.

MEP lo cambia e rumbo di nos pais atraves di un programa di desaroyo economico agresivo, creando mas oportunidadnan pa inversion y pa empleo, baha costo di bida y trece un balance responsabel den finanzas publico. Y na mes momento trece transparencia y integridad bek den gobernacion.

Como ciudadano tur dia nos ta keda confronta cu escogencianan cu nos mester haci.

Sinembargo cada tanto tempo nos ta keda yama pa contesta un pregunta mucho mas grandi:

Ki tipo di pais nos kier ta?

Den e eleccion venidero abo como votado tin e oportunidad pa medio di bo voto determina unda nos ta bay.


Cu bo voto tambe bo por pone un fin na e situacion di desaster financiero, criminalidad, mas pobreza, poco confiansa y nada di perspectiva pa nos hobennan y cambia e rumbo di nos pais pa e rumbo di progreso y bienestar pa tur.

Ban hunto p'e cambio.



MANEHO HUDICIAL Y NOS PRIORIDAD PA HACI ARUBA MAS SIGUR

E naturaleza di criminalidad na Aruba a cambia hopi den e ultimo añanan aki. No solamente cierto delitonan a aumenta sino tambe e crimen organisa a cuminsa haya forza, hasta den gobernacion. Atraconan arma cu arma sumamente sofisticada. Un averahe halto di auto ta wordo horta pa dia. Den e prome shete lunanan di aña 2017, nos a conoce casi 60 atraco arma y algun asesinato. Atraconan ya no semper ta wordo raporta na Cuerpo Policial mas, pasobra Cuerpo Policial no por atende cu tur.



"Poverty is the mother of all crimes", y e realidad ta cu tanten cu nos no tin desaroyo economico real, tanten cu nos tin hopi pobresa y tanten cu no tin perspectiva, e problemanan di criminalidad lo sigui aumenta. Pero nos lo no sinta man crusa.

MEP lo percura pa tur e actornan riba e tereno di husticia funciona optimal. MEP tin e determinacion pa combati criminalidad cu man duro.

Cu un plan ambicioso, pero realistico MEP lo haci Aruba mas sigur, cuminsando cu control severo di nos costanan, y unabes nos costanan ta controla, MEP lo pone ordo paden den cas y lo enfoca mas riba prevencion. Pasobra tanten cu arma, droga y personanan sigui drenta Aruba na forma ilegal y sin control, bo no por pone ordo den cas.

MEP lo haci Aruba un lugar mas sigur pa un y tur, y lo promove husticia den tur sentido. Legalidad riba ilegalidad.

PRIORIDAD PA COMBATI CRIMINALIDAD

- Institui un plataforma nacional consistiendo di tur departamento cu mester atende cu criminalidad y profesionalisa e departamentonan mas ainda: Cuerpo Policial, Ministerio Publico, KIA, CEA, Reclassering, Departamento di Asuntonan Social, Migracion, Guarda nos Costa, Aduana.

Den e plataforma aki lo tuma e decisionnan pa un Aruba mas sigur, y e decisionnan aki mester wordo ehecuta cu prioridad halto.

Stimula y fortifica e participacion di e profesionalnan den e plataforma nacional di Husticia y Siguridad.

- Den consulta cu Ministerio Publico y Cuerpo Policial lo revisa e "rechtshandhavingsbeleid" y "vervolgingsbeleid", cu e enfasis pa preveni, descurasha y desincentiva criminalidad cu e menaza di castigonan mas halto.

Lo intercambia ponencianan entre Gobierno, Parlamento y Corte di Husticia pa asina yega na mas concordancia dentro di Reino Hulandes.

- Inverti den material, ekipo, training y tecnologia pa e departamentonan aki por combati criminalidad na forma mas efectivo.

Hunto cu ministerio Publico y Cuerpo Policial, implementa un sistema tecnologico moderno di monitoria suceso y crimen a base di coleccion di informacion ("big data"), pa asina por evalua solucionnan preventivo a base di datonan real y actual.

- Control estricto di nos costanan, pa detecta y actua mesora contra importacion ilegal di droga, arma y hende, pa medio di entre otro radarnan, helicopter y drone, Polis Maritimo, Guarda nos Costa, Migracion, Aduana.

- Mas contacto permanente cu barío. Pa traha riba un structura di maneho mas conecta cu pueblo den e barionan, mester reintroduci y/of reforsa e concepto di un unidad policial den cada barío cu tambe ta yuda den e parti di prevencion di criminalidad y mester wordo fortifica cu material y personal pa por traha efectivamente.

- E post di Polis den barío lo ser amplia cu trahado social. E unidad policial den barío cu asistencia di trahado social mester traha hunto cu gruponan consistiendo di bisiñanan den barío pa vigila den barío.

- Aumenta seguridad inmediatamente den e area turistico den coordinacion estrecho cu sector hotelero, apuntando agentenan policial exclusivamente den areanan turistico y hotelero ("Tourism Police"), canando rond of riba 'segways' of den "golfcarts", pa asina nan por tin contacto cu e turista, y e turista por sinti'e mas sigur.

- Tambe lo bin cu e proyecto di camara den e area turistico, pa miho vigilancia.

- Den e maneho lo pone enfasis particular riba e productividad, eficiencia y satisfaccion den trabao den cuerponan uniforme, dunando e trato husto y humano na cada ser humano.

- Introduccion di un departamento di "Control Calidad Husticia" pa salvaguardia e convivencia entre husticia y comunidad.

- Esun cu viola ley mester haya e castigo husto pa e crimen cu el a comete, y despues mester ser brinda e oportunidad pa rehabilita realmente y a traves di programanan di apoyo laboral pa por integra den sociedad cu un trabao; na mes momento yuda e famia pa e reintegracion di nan familiar despues di sinta su castigo.

- Lo duna mas contenido na programanan di reintegracion social, por ehempel via Reclasing, y stimula programanan di resocialisacion den e Instituto Coreccional Arubano.

- Atencion special lo wordo duna na agresornan den caso di violencia domestico y violencia sexual, pa haya ayudo, entre otro psicoemocional, y asina evita repeticon.

- Introduccion di un "Centro Hudicial Hubenil" (Justitiële Jeugd Inrichting Centrum) pa proteccion y reeducacion di hobennan.

- Introduci programanan di informacion cu e meta di engrandecere e confiansa den e autoridad di Cuerpo Policial.

- Maneho lo concentra riba PREVENCIÓN, enbes di e maneho di represion.

- Patruya policial y Polis uniforme [mas blauw riba caya] mas visibel den tur barío.

- Personal administrativo lo atende cu trabaonan administrativo, en bes di agentenan policial.



- Crimennan sexual contra menornan di edad y hende muher lo conoce castigonan mas severo, y lo publica identidad di e agresor; importante den e cuadro aki ta pa introduci proceduranan pa yega na acumulacion di prueba mas lihe.

- Introduccion di prueba di identidad obligatorio pa haci e trabao di control di polis riba violacionnan relaciona cu edad posibel, por ehempel, benta di alcohol na menornan di edad.

- Introduccion di "Boton di Panico" pa duna un extra atencion na esnan mas vulnerabel pa cu criminalidad.

- Adapta e leynan y aumenta castigo pa traficacion y uzo di droga riba caya, barnan, centronan nocturno y scolnan. Nos lo adapta leynan di droga pa aumenta castigo pa narcotraficantenan y complicenen.

- Apunta areanan specifico [pa medio di "zoning"] pa actividad y bida nocturno y determina na unda e facilidadnan lo por keda habri despues di 1'or di marduga, aparte di e hotelnan cu tin permiso pa keda habri mas laat.

PRIORIDAD PA BRINDA MAS PROTECCION HURIDICO NA CIUDADANONAN:

- Haci Corte den Prome Instancia mas accesibel pa ciudadanonan di menos recurso, amplia e posibilidad di abogado liber y rebaho di griffie geld.

- Sostene Tienda di Ley envolviendo studiantenan di ley di Universidad di Aruba pa duna conseho gratuitamente y/of defende casonan pro deo bao guia di un patron of docente.

- Cambia e Landsverordening Administratieve Rechtspraak y Landsverordening Ambtenaren Rechtspraak pa brinda mas proteccion na e ciudadano y/of empleado publico, specialmente den caso cu gobierno no tuma decisionnan of no tuma decision na tempo.

- Ekipa e Departamento di Asuntonan Huridico cu mas hurista pa specialisa y defende caso pa gobierno riba tereno di LAR, Ley di Ambtenaar y riba tereno di casonan civil, pa centralisa e casonan na e departamento aki y asina baha gasto cu gobierno ta paga na oficinanan di abogado.



PRIORIDAD PA NOS MASCOTANAN Y OTRO ANIMAL DOMESTICO DEN CUADRO DI TANTO, ORDO PUBLICO COMO DERECHONAN DI ANIMAL

Despues cu a introduci e ley di cacho, a nota cu e no ta ser enforsa. Debi cu e ta un "politieverordening" y polis tin prioridadnan mas importante pa acudi cu ne, e ley no ta keda ehecuta adecuadamente.

Nos mester implementa un otro forma pa enforsa e ley. Y e mester ta un responsabilidad di nos tur.

Na ken mester acudi ora un doño no ta tene su cacho den cura, of ken mester controla e abusonnan di cacho y otro animal di cas. Ta preguntanan cu lo keda contesta despues di haci e evaluacion necesario.

Den esaki e organisacion "Animals Rights Foundation" lo ser pidi pa hunga un papel crucial.

Lo reinstitui e plataforma di ley di cacho, na bienestar di e bestianan y den bienestar di Aruba, y lo bini cu mas campaña di conscientisacion pa muestra doñonan kico tur ta encera e responsabilidad di cuida pa nan animalnan.

Mester realisa cu tuma un cacho of un puppy of cualkier animal domestico, tin hopi responsabilidad cu `ne: cuminda adecuado, cuida veterinario, gasto pa no contribui cu mas cacho riba caya (steriliza of capa) etc.

Nos mester realisa cu keda sin tuma un cacho tambe por ta un escogencia responsabel, si di antemano bo sa cu bo no tin tempo p'e, ni e manera di provee un cuida adecuado p'e.

Tambe tin hopi pushi "sin doño" riba caya, y prome cu e bira necesario pa implementa un ley di pushi, MEP ta kere cu tin solucion pa esaki.

Estudionan di paisnan grandi cu tambe tabatin hopi pushi riba caya ta muestra cu capa/sterilisa e pushinan riba caya y pone nan bek caminda nan tabata, ta reduci e cantidad drasticamente.

Esaki por hasta bira e "stage" pa studiantenan cu ta studia pa bira dokter di bestia, pa bula bin Aruba pa nan siña capa/sterilisa pushi, y asina yuda Aruba cu su problema.

Pa cacho no tin mucho sentido pa haci esaki pasobra 8 di e 10 cachonan riba caya tin un doño. Pero si por bin, conhuntamente cu veterinarianan local, cu campaña di sterilisacion pa reduci e cantidad di cacho (y pushi) cu por reproduci mas y asina contribui na baha e cantidad di animalnan no desea.

No solamente tin hopi cacho y pushi riba caya, sino tambe tin hopi "road kills" (auto cu ta pasa riba nan y pues mata e cacho y pushinan riba caya).

Berdad e un tin di haber cu e otro pero esaki tambe mester keda atendi pasobra e ta un mahos bista pa nos comunidad y nos turistanan y algun ya a laga sa di no bolbe Aruba pa via di esey. Esey tampoco nos mester, considerando cu turismo ta un pilar grandi di nos economia.

Lo reevalua e uzo di "kill cage" pasobra bestianan tambe merece un morto digno.

En todo caso lo muda e kill cage pa un lugar mas adecuado, y nos lo percura pa e manera di pone nan drumi por ser ehecuta na un otro forma menos cruel y mas digno.

"Nos PRIORIDAD ta pa haci Aruba un lugar mas sigur y mas husto pa nos yiunan y nan yiunan por biba trankil".

MANEHO MIGRATORIO Y PRIORIDAD NA INTEGRACION

Aruba ta un pais cu a wordo forma a traves di varios decada pa migrantenan cu a bin for di tur skina di mundo y hunto cu nos Arubiano a construi nos pais. Integracion ta keda e yabi pa crea un comunidad harmonioso y respetuoso. Den e ultimo añanan e maneho riba tereno migratorio a laga hopi di desea. Esnan cu a acudi pa prolonga nan permiso hopi biaha ta wordo confronta cu un proceso complica, intransparente y cu ta cambia frecuentemente.

Partido MEP ta kere den un maneho migratorio mas controlabel y mas humano, den cual tin un distincion den tratamiento di e prome permiso y e permisonan subsecuente.

Desde nos Status Aparte nos a habri nos fronteranan pa trahado di exterior bin duna nos un man pa desaroya nos economia.

Debi sinembargo, na e cifra halto di desempleo actual, e maneho pa otorgamento di prome permiso lo ta mas estricto, pa proteha e mercado laboral pa esnan cu ya ta biba na Aruba.

Un prome permiso lo ser otorga solamente y exclusivamente si tin cupo di trabao cu no por wordo yena cu un persona cu ya ta biba na Aruba. E proceso di prolongacion lo keda agilisa y simplifica.

PRIORIDAD: PROMOVE INTEGRACION Y UN MANEHO MIGRATORIO MAS HUMANO, PERO ALABES MAS CONTROLA.

MEP ta kere den fomenta integracion y lo institui un Departamento di Integracion, separa di e departamento di Migracion/ Admision.

E Departamento di Integracion lo brinda sosten na e inmigrante pa asina logra un integracion mas rapido y pa e inmigrante por sinti cu realmente e ta forma parti di nos comunidad.

- Implementa un maneho pa integracion di tur esnan cu a scoge pa bin biba y traha na Aruba, den fase, acopla na cada prolongacion di permiso.

Nos idioma Papiamentu, nos cultura y custumbrenan mester ta e base pa cada un participa y forma parti di nos comunidad.

- Nos norma y balornan tambe mester bira parti di e maneho di integracion.

- E Departamento di Integracion cu lo ser institui, lo pone enfasis riba programanan di integracion y na mes momento brinda sosten den traduccion di cartanan, splica procesonan.

- Proceso pa aplica pa permiso y pa pasaporte mester bira mas transparente, den cual sosten lo wordo brinda door di e 'centro di apoyo' na e Departamento di Integracion (pues no esun encarga cu admision).

- Pasonan lo ser tuma pa encamina e cambio di e test di idioma pa naturalisacion, mirando cu e idioma Hulandes ta dificil pa esnan cu ta papia Spaño, alabes lo plantea den cuadro di Reino Hulandes pa cambia e ley di nacionalidad di Reino Hulandes bek na locual e tabata promer cu aña 2011, na unda un persona cu ta den proceso pa haya su naturalisacion por a scoge pa haci su examen na un di e lenguahenan oficial di Reino Hulandes, cualnan ta Fries, Hulandes, Ingles y Papiamentu.

MEP ta kere den un crecimiento responsabel, na unda por percura pa garantisa cada ciudadano cu ta biba den nos pais un calidad di bida halto.

PRIORIDAD: PERMISO, ADMISION, INTEGRACION

- Reorganisa e Departamento di Admision existente di tal forma cu e lo ta encarga exclusivamente cu admision y permisologia migratorio, no cu integracion como tal ni cu e formulacion di maneho.

- Alabes e proceso lo bira uno mas transparente y e departamento mester por contesta e cliente (un si of un no) den no mas cu 4 siman.

- Formulacion di maneho lo ta den man di e departamento reinstitui di Asunto Huridico (separa di legislacion) y Orden Publico.

- E proceso pa otorgamento di e prome permiso lo wordo revisa pa asina tin un control estricto den e casonan aki; otorgamento di prome permiso ta acopla na cuponan di trabao vacante, despues di a haci tur esfuerzo pa yena e cuponan aki prome cu personanan cu ta bibando na Aruba caba.

- E proceso pa prolongacion di e permiso lo wordo adapta y agiliza, y lo cambia den cierto casonan na prolongacion un bes den cada dos aña. Aki ta wordo pensa na casonan cu e circunstancianan a keda igual y mesun doño di trabao.

- Lo reintroduci e posibilidad di emitir permisionan di corto duracion (di algun dia so te tres luna y di seis luna) na unda e personanan lo bin pa actividadnan laboral specifico: “turn-around” den refineria, auditing, marketing, consulting, banda musical, grupo di baile y di arte, docente/lecturer, stagiaire/internships, trabaonan di corto duracion no-tecnico pero pa cual no por haya hendenan local y trabao tecnico y specialisa di corto duracion pa por ehemplo companianan manera WEB, ELMAR, SETAR, HOSPITAL, UNIVERSIDAD(nan).

- E permisionan aki cual no ta duna derecho di registra na CENSO, lo por ser pidi exclusivamente pa e dunador di trabao y bao di condicion cu ta cera un seguro medico y di responsabilidad legal (WA-verzekering) pa e persona cu ta bini di afor.

- E permisionan aki lo ser emitir dentro di un siman, pa e departamento encarga cu admision y lo no por ser prolonga.

Esaki tumando na cuenta cu nos ley di registro civil ta existi cu despues di un estadia di seis luna na nos isla tur hende mester ta registra na CENSO y esaki por solamente si tin un permiso (normal) di minimal un aña.

- Lo cuminsa cu un proyecto piloto pa stagiaires hulandes den sector horeca. Cu e cambio importante aki e trabao di DIMAS lo cambia, y e enfasis lo ta mas riba e control na momento di trata e prome permiso, y control durante temporada di valides di e permiso.



**“Nos norma y balornan
tambe mester bira parti di e maneho di integracion”.**

Control na pia di trabao sinembargo lo ta den man di Departamento di Migracion [seccion “Kust surveillance en vreemdelingtoezicht, ex -Guarda Nos Costa] y Cuerpo Policial (“toezicht/rechtshandhaving”).

- Admision di turista y posibel prolongacion di admision como turista, lo ta den man di Departamento di Inmigracion, no di DIMAS. MEP ta kere firmemente den Ordo na Nos Costanan.

Un Cuerpo di Inmigracion cu tur su autoridad necesario ta vital pa logra esaki, Ta pesey lo bini cu cursonan intensivo y cu ekiponan necesario pa upgrade aun mas e personal di Inmigracion y e control na nos hafnan y na Aeropuerto y na mes momento reactiva e proceso pa haci e Cuerpo di Inmigracion un Cuerpo autonomo!



PRIORIDAD: PERMISO, ADMISION, INTEGRACION



- Aprobacion e ley di admision cu a keda trata pa Parlamento di Aruba ya desde aña 2012 cual proposito tabata pa pone nos pais cumpli cu diferente tratado internacional, entre otro riba derechonan humano y pa e proceso di migracion bay cay bek bao di e ministerio di Husticia, pero tambe pa e procesonan ta mas transparente, mas rapido y ta tene cuenta cu e union familiar di tur ciudadano.

E gobernacion actual a sconde e proyecto di ley aki den lachi pa por sigui eherce patronahe politico y haci negoshi corruptivo cu permisionan di residencia, mientras tanto cada dia ta viola e leyman existente di admision.

- Lo revisa y adapta e lista di paisnan cu visa obligatorio y encamina e proceso pa elimina paisnan den region di e lista aki.
- Aumenta efectividad di e ‘Prisma Project’ y scolnan acredita caba, pa por garantiza un integracion di alumnonan den nos sistema di enseñansa, sin perhudica e alumno. Lo evalua si ta necesario pa aplica e prisma-project pa muchanan Arubiano mes, si acaso nan tin un retraso den estudio y na desaroyo.
- Lo stimula formacion personal y proyectonan multicultural den centronan di barrio pa realiza un integracion exitoso.

“MEP ta kere den un maneho migratorio miho controla y mas humano, dirigi riba integracion real. Integracion ta indispensable y fundamental pa por tin un comunidad na unda ta reina igualdad y fraternidad”.

3

MANEHO ECONOMICO BAHA COSTO DI BIDA, CRECEMENTO ECONOMICO Y CREA CUPO DI TRABAO

Ultimo tempo costo di bida a aumenta hopi, y prijsnsan ta fluctua di un supermercado pa otro. Prijs di awa y coriente a conoce aumentonan, a pesar cu mundialmente prijs di crudo a baha na nivelnan mas abou den historia. E desaroyo aki a pone cu varios famia ta bibando den pobreza of na borde di pobreza. MEP su prioridad ta baha costo di bida.

MEP ta consciente cu crecemento economico ta un medio pa realisa metanan y no ta un meta riba su mes.

Na final e meta lo mester ta bienestar di tur habitante caminda mester resalta un enseñansa na nivel, un bon salud publico, un sentimento di siguridad halto, vivienda na alcance di un y tur y acceso na alimentacion na un prijs rasonabel.

MEP lo diversifica nos economia creando varios pilarnan economico nobo. Esaki lo garantiza un crecemento economico stabil.

MEP lo innova nos economia pa prepara e base pa economianan nobo.

Stimulacion di crecemento economico, cu e meta principal pa crea empleo, lo tin atencion maximo pa partido MEP.

Na prome lugar lo stimula y sostene actividadnan cu ta haci uzo di nos infraestructura turistico presente.

Esaki ta encera cu tur desaroyo riba sectornan, por ehempel medico, entretenimento, enseñansa, arte, deporte, economia di conocimiento, encuentronan di negoshi internacional, cu ta haci uzo di infraestructura turistico lo ser aplaudi, amplia y encurasha.

Na di dos lugar tur inversion y desaroyo cu e meta pa substitui importacion pa medio di produccion interno tambe lo ser encurasha, sosteni y aplaudi.

Primeramente lo pone atencion na e factornan cu ta strobando un desaroyo economico sano, y mesora despues lo pone atencion na desaroyonan nobo, pa garantiza e crecemento economico stabil.



REDUCCION DI COSTO DI BIDA Y FOMENTA CRECEMENTO ECONOMICO

- Introduccion di un control mas riguroso y confiabel di prijsnan den supermercadonan, pasobra e diferencia den prijs actualmente ta demasiado y den caso cu ta necesario, introduci leyman special den cuadro di maneho di prijs riba productonan pa asina realisa un poder di compra mas husto.
- Ampliacion di e canasta basico cu mas producto cu locual Gobierno tin control di e prijs na e momento aki.
- Explora importacion for di region y Latino America di productonan di calidad y na un miho prijs.
- Den cooperacion cu 'entrepreneurs' local explora e posibilidad pa introduci un sistema a base di tecnologia ('mobile app y online database') pa yuda nos cunukeronan maneha nan negoshi di agricultura y comunica cu nan cumpradornan.

A base di e sistema aki por tambe colecta informacion ('data') na un manera mas eficiente y yuda nos cunukeronan ta mas exitoso.

- Lo apoya y sostiene sector priva den establece un Mercado Popular caminda e ciudadano lo por cumpra entre otro berdura y fruta na prijs barata. E mercado popular lo sostiene nos pilar economico di agricultura, cria y pesca.

Lo combina esaki tambe cu benta di artesanía y cuminda crioyo. E Mercado Popular aki lo ta accesibel pa nos poblacion local y turistanan caminda lo topa otro den un bon ambiente.

- Ekipa fundacion CAS pa por eherce miho control, y pa tin un bos mas fuerte den e proceso di proteccion di consumidornan.
- Explora e posibilidad di importa gasolin di paisnan den region, caminda prijs di gasolin ta mucho mas abao cu aki na Aruba.
- Baha winstbelasting, loon y inkomstenbelasting, y focus mas riba belastingnan indirecto.
- Den cooperacion cu nos partnernan den Reino Hulandes nos mester habri e mercado di transporte marítimo y busca manera pa importa produccionan for di otro sitionan (area portuario) na Estados Unidos, pero tambe for di Colombia, Panama, Republica Dominicana.
- Explora formanan di energia alternativo cu mester reduci gastonan di awa y corriente inmediatamente.



E prome aspecto cu mester di atencion urgente ta e economia local, cu a keda afecta seriamente.

“Doing business in Aruba” ta actualment un caminda di cruz, debi na diferente factor principal cu nos mester coregi:

- Burocracia, esta ‘red tape’ mester ser reduci y/of caminda ta posibel, elimina.
- Mester por establece empresanan mas rapido, y na forma mas centralisa (“one-stop-service”). Esaki ta necesario pa un clima di inversion sano.
- Lo reevalua e maneho actual di permiso (vestigingsvergunning) pa haci esaki mas transparente y eficiente.
- Lo stimula iniciativa empresarial di hobennan pa medio di estimulon fiscal na momento cu nan cuminsa un empresa chikito. Un reduccion pa principiante.
- Gobierno mester funciona como un partner strategico y brinda conocimiento y facilita cu politica di innovacion pa sector priva den desaroyo y aceleracion di innovacion y fungi como un ehempel pa tur sector pa asina stimula un mentalidad innovativo pa henter e isla.

Asina Aruba lo lidera e region den maneho innovativo basa riba inclusividad, colaboracion y transparencia.



DIVERSIFICA NOS ECONOMIA Y CREA CUPO DI TRABAO

MEP lo traha e base pa innova nos economia, prepara pa economianan nobo. Pa por garantisar un crecimiento economico stabil, duradero y lo concentra riba stimula varios pilar economico.

Crecimiento economico no ta un meta riba su mes, sino e ta un forma con pa logra e meta: progreso y bienestar di tur ciudadano. E desaroyo economico cu MEP stimula lo tin e bienestar di e ser humano central, por ehempel crea empleo, of baha costo di bida.

- Stimula “entrepreneurship”, especialmente bao di nos hobennan, pone capital disponibel, y apoyo administrativo y legal pa e negoshi bira exitoso. E meta ta pa tin un crecimiento inclusivo, y no solamente pa e grupo cu tin e poder financiero.

- Introduci un BANCO DI DESAROYO pa stimula un generacion nobo di empresarionan local, riba nivel chikito y mediano, creando cuponan di trabao (tambe pa nos cunukeronan).

E Banco aki no solamente lo financia empresa y fabricanan chikito y mediano, sino atraves di un agencia di apoyo lo crea posibilidadnan pa garantisar e empresario cu e guia necesario pa e ta exitoso.

- Cu bista riba futuro y desaroyonan mundial tecnologico, lo desaroya un pilar economico nobo cu ta basa riba tecnologia y conocimiento. Asina lo stimula exportacion di productonan y servicionan innovativo (“Made in Aruba”) cu pa cuminsa no ta rekeri inversionnan di capital intensivo pero cu si por crea cupo di empleo innovativo pa nos hobennan.

Esaki tambe lo percura pa yuda atrae nos hobennan profesional cu a bay studia afo pa bin bek Aruba, y tambe lo encurasha un espirito di innovacion y empresarial cu ta un instrumento imporante pa desaroyo economico en general.

Un pilar nobo cu ta basa riba tecnologia y conocimiento lo trece beneficio adicional y synergia pa tur otro industria existente, lo stimula e aceleracion di un aparato gubernamental eficiente y innovativo, lo atrae inversionista y tambe bay man den man cu mehoracion di calidad di ensenansa.

- Stimula diversificacion di e pilar turistico, cu entre otro turismo di salud, enseñansa, arte, deporte, economia di conocimiento, encuentronan di negoshi internacional.

E beneficiar ta grandi pasobra e infraestructura turistico tey caba y por ser uza mas optimalmente.

Desaroya e pilar di Turismo di Salud y desaroya Aruba como centro di tratamiento of cirugia estetico, y centro odontologico.

Haciendo uzo di e situacion geografico privilegia di Aruba y teniendo e gastonan na nivel competitivo, por desaroya Aruba den un centro estetico y na mes momento brinda e oportunidad na e pashent turista pa relaha. Mesun desaroyo lo wordo stimula riba demas areanan menciona.

- Fortifica e pilar economico di servicionan financiero, teniendo cuenta si, cu regulacion internacional, pero creando un mercado ‘niche’ financiero cu instrumentonan financiero moderno y atractivo.

- Amplia e pilar economico di servicio, cu servicionan internacional, haciendo uzo di e posicion geografico di Aruba, y crea un Instituto di Arbitrahe Arubano (“IAA”) cu ta un alternativa pa companianan Americano y Europeo cu ta inverti den Latino y Sur America, cu na momento di disputa entre e compania y e gobierno di e pais ta scoge pa e Instituto di Arbitrahe di Aruba.

- Desaroya “Agricultura, Cria y Pesca” den un pilar economico pa asina baha e dependencia di importacion di cierto berdura, carni y cuminda di lama.

Pa stimula nos cunukeronan mester ofrece nan awa na un prijs hopi reduci. Alabes crea e cuadro legal y economico na unda esnan cu ta interesa por establece un plantacion tipo hydroponics riba escala grandi den cercania di WEB.

Pero tambe un proyecto solido y sostenibel a largo plaso pa distribui e awa no potabel pero di bon calidad si pa agricultura cu WEB ya por produci.

Durante ultimo gobernacion di MEP ya caba expertonan di WEB a desaroya un plan pa esaki. Tambe e tempo ey a traha un plan pa utiliza e awa di e planta di purificacion di pariba di brug cu no ta bay Bubaliplas cu lo por ser uza pa “plantsoendienst”.

Partido MEP den e proximo Gobernacion, den cooperacion cu WEB y Departamento di Agricultura, Cria y Pesca lo traha riba un plan pa tur e diferente tiponan di awa aki.

Desaroyonan mundial ta indica cu e necesidad pa un pais percura pa su propio cuminda ya no ta un luho.

Gobierno di MEP su rol ta pa stimula desaroyo riba e ramo di agricultura, cria y pesca y den cuadro aki MEP lo traha den cooperacion cu Gobierno Hulandes, y e “landbouw hogeschool” nan Hulandes y demas instancia internacional.

Tambe lo realisa un plan cu por mehora y expande e damnan cu nos tin pa di e manera ey mantene y mehora e calidad di nos awa subteranea, asina yama “grondwater”.

- Introduci estimulo fiscal di inversion pa incentiva comercio local pa inverti den nos economia, por ehempel pa ‘facelift’ e propiedad, pa emplea mas hende y reintroduci “investeringsaftrek” pa inversion grandi cu ta alabes capital intensivo.

- “MADE IN ARUBA”: fabricacion di productonan traha na Aruba lo crea un pilar economico nobo, creando cuponan di trabao.

Aki ta pensa na productonan cu nos ta uza frecuentemente na Aruba, por ehempel cups, napkins, etc.

Tambe productonan di agricultura y di pesca, y productonan di artesanía; nos lo proteha nos mercado local pa e productonan aki y na mes momento garantiza cu e productonan no ta bira mas caro.

INNOVACION Y ESPIRITO EMPRESARIAL

- Lo stimula y aplaudi innovacion, productonan, servicio y procesonan nobo. Lo haci esaki cu organisacion di encuentronan dirigi riba nos hobennan.

Caminda ta necesario lo inclui conocimiento den Reino y internacionalmente riba e area di interes.

- Lo keda stimula pensamiento y accionnan innovativo como e base pa crea crecimiento economico.

Den cuadro di nos realidad como isla, innovacion como base pa crecimiento electronico mester ser busca den innovacion di servicionan internacional cu ya caba ta of por wordo brinda for di Aruba.

- Atraccion di mas universidadnan manera esnan di medicina presente na Aruba. Creacion di facilidadnan di investigacion den cooperacion cu institutonan internacional.

- Innovacion den actividadnan di atraccion turistico manera festivalnan, concierto, congresonan internacional cu lo por haci uzo di nos estructura.

- Un maneho innovativo pa revitaliza centro di ciudad (biba, traha, haci compra, sali, etc.).

E maneho innovativo pa centro di ciudad no lo solamente trece bida y actividad commercial bek, pero tambe lo stimula hobennan pa haci centro di ciudad nan centro creativo pa biba, traha y colabora cu otro.

Mester stimula actividadnan pa sector priva por inverti atrobe eyan, y lo reevalua e factornan cu a causa daño na desaroyo den centro di ciudad, manera seramento pa trafico den Caya Betico Croes, e tram y parkeermeter.

MEP lo evalua con ta e miho forma pa habri caya Betico Croes bek pa trafico, con pa soluciona e problema di parkeo sin mester haci uzo di parkeermeter, y con ta e miho forma pa transporta turistanan crucero pa Caya Betico Croes, estimulando nan pa baha di tram na comienso di caya y cana den caya.

- Lo inverti den ‘Centraal Bureau Statistiek’ (CBS), un organo central di informacion cu a ser negligia door di gobierno actual, pa asina por haci decisionnan a base di informacion di calidad y actual (‘real and current data’), y asina hisa e capacidad di coleccion y analysis di informacion cu ta sumamente importante pa un maneho responsabel y bon gobernacion.

- Promove, stimula y encurasha sentido empresarial cerca e poblacion local, specialmente cerca hobennan.

Ta importante pa empresario local nobo y fresco introduci ideanan nobo den nos economia.

Mester cambia e percepcion cu mester djis sigui un preparacion pa bay traha den un empresa, en bes di prepara pa crea empleo y ser bo propio doño di negoshi.

- Stimula centronan nobo di preparacion den areanan tecnologico di informacion caminda nos hobennan por desaroya programanan pa uzo di poblacion en general y specifico.

- Lo stimula e disponibilidad di capital pa empresanan nobo cu ta crea cupo di trabou y cu tin potencial pa exporta productonan y servicionan pa exterior.



MANEHO RIBA MERCADO LABORAL Y AUMENTO DI PRODUCTIVIDAD

E clase trahador ultimo añanan ta esun cu a paga e cuenta di mal maneho. Un economia stagna, varios negoshi a cera nan porta, inseguridad na pia di trabou, y otorgamento di miles di permiso y “ontheffing”, a haci un impacto grandi riba e clase trahador. MEP lo trece bek estabilidad y tranquilidad riba mercado laboral. Mes momento lo enfoca riba aumenta productividad.

MEP lo introduci cambionan pa mehora e posicion di e clase trahado na Aruba:

- Siguridad di trabao y/o proteccion di continuidad di trabao. MEP ta considera di suma importancia cu garantianan den ley den cuadro di continuidad di trabao keda vigente;
- Bienestar di e trahado, siguridad, tempo di sosiego, vacacion. MEP ta constata cu e siguridad na pia di trabao ta laga hopi di desea, tambe e cumplimiento cu tempo di sosiego y vacacion manera stipula door di ley.
- Inspeccion di trabao. MEP lo percura pa un upgrading y miho funcionamiento di e tarea di inspeccion.
- MEP lo fomenta cooperacion y percura pa e cuadro legal den cual e doño di trabao y trahador ta dialoga pa por yega na acuerdonan di condicionnan di trabao progresivo na bienestar di nos economia.

Den e cuadro aki lo introduci un “Stichting van de Arbeid”, na unda doñonan di trabao y trahadornan lo dialoga riba un base regular, ancla den ley, pa yega na acuerdonan di condicionnan di trabao progresivo.

- MEP lo mehora e maneho di mercado laboral. Nos ta consciente cu actualmente tin varios asunto riba e mercado laboral cu no ta cana bon.

MEP su punto di salida ta cu empleo mester ta na prome lugar pa nos hendenan local, pues tur hende cu ya ta biba na Aruba.

Pero si no tin hende local anto mester yega na proceduranan pa atrae trahado di exterior cu ta miho controla, menos complica y mas transparente.

- Departamento di Labor lo asumi un papel mas activo den brinda asistencia na empleado, specialmente esnan cu haya nan den un conflicto laboral y ta core riesgo di keda sin trabao, pero tambe pa yuda esnan cu ta na cas sin trabao.

- Mester bin un maneho mas activo pa logra haya trabao, specialmente den caso cu ta un persona cu onderstand. Esaki mester wordo combina cu “om-, her-, of bijscholing” di e hendenan cu ta sin trabao.

- Introduci programanan dirigi riba inclui mas hende muher den mercado laboral y elimina desigualdad na pia di trabou.

- Introduci posibilidad pa traha menos ora, pero sin perde derechonan secundario; experiencia den otro pais a demostra cu esaki a contribui na aumento di productividad.

Pa trahadornan hoben y esnan di edad 50+ cu mester drenta mercado laboral, MEP ta pensa tambe riba incentivanan fiscal pa yuda e personanan aki haya trabao mas lihe y/of reeduca nan mes.

E maneho di empleo lo ta pa stimula dunador di trabao, a base di incentivo fiscal, haci cursonan di educacion of recapitacion deducibel di “winstbelasting” di e compania.



MANEHO PA REALISA ACTIVIDAD ECONOMICO NA SAN NICOLAS

E unico dos actividadnan comercial economico na San Nicolas cu a mantene nan cabes riba awa e ultimo decadanan ta bida nocturno y mundo bancario.

Ta tempo pa San Nicolas haya un atencion special. Conhuntamente cu e organisacion cu ta representa e establecimentonan nocturno na San Nicolas, SaniBars, y cu e organisacion cu ta representa comercio di San Nicolas, San Nicolas Business Association lo traha un plan con por haci San Nicolas un alternativa riba area hotelero como sitio pa “outing” y di e manera aki crea e desaroyo tan espera na San Nicolas.

Nos lo crea conhuntamente condicionnan cu lo haci inversion den e area aki beneficioso pa haci negoshi.

Lo crea un ‘buffer zone’ entre e negoshi di bida nocturno y night club di un banda y negoshi di bida diario di otro banda. E zona aki lo ta un di e areanan cu lo haya permiso pa keda habri despues di 1’or di anochi.

Mirando cu Oranjestad, Noord y e area hotelero ta bastante satura cu construccion, lo studia e posibilidad pa San Nicolas desaroya e area pa e centro financiero di Aruba. Oficinanan di Financial Services lo por establece nan mes na San Nicolas y lo por gosa di un regimen fiscal favorable.

Lo crea espacio pa negoshinan chikito cu semper a haci San Nicolas grandi y asina crea un San Nicolas ‘Nobo’ pa compranan familiar.

Nos lo desaroya e area di Zeewijk den un area pa “light industry”.

Nos lo institui un comision special cu lo negocia cu Refineria di Aruba y Citgo tocante tereno bashi y e terenonan cu ta ser uza como “opslagterrein”, pa debolbe un parti di esaki na pais Aruba, pa desaroya esaki. Lo kita parti di e muraya di “Lago” y lo habri esaki pa publico por yega te lama, y asina crea espacio pa Centro di San Nicolas por tin su propio ‘Waterfront Area’. Di e manera ey San Nicolas lo bira mas atractivo pa comercio di “horeca”.

San Nicolas Business Association, Camara di Comercio, ATIA y demas institucionnan comercial, lo ta partnernan strategico den e maneho mas activo di Gobierno pa stimula esnan cu kier establece negoshi na Aruba, pa haci esaki na San Nicolas.

Lo desaroya Seroe Colorado pa construccion di mas vivienda; esaki ta conta pa e terenonan bashi y e casnan den mal estado.

Lo desaroya Sero Colebra (Colorado Point) como un atraccion turistico, un mirador, cu un bunita bista di San Nicolas y vecindario, y lo desaroya e area caminda antes tabata tin e hospital di Lago.

Entre Rodgers y Baby Beach lo mehora e facilidadnan deportivo y lo desaroya facilidadnan comercial di horeca y deporte acuatico. Importante ta cu habitantenan di San Nicolas lo tin preferencia pa opera e facilidadnan aki, y asina mantene e historia y cultura di San Nicolas bibo.

Lo desaroya Boca Grandi Beach como e area pa deporte di Surfing en general y Kite Surfing en particular.

Lo sostene Aruba Golf Club pa busca un partner strategico pa desaroya Golf Club den uno cu un “tinto” specifico estilo Cunucu Arubiano; lo explora e posibilidad di desaroya un proyecto di vivienda riba e tereno.

Nos lo desaroya un Sporthotel moderno cu tur facilidad den e area di e parke deportivo Joe Laveist, Community Pool y sportzaal “Don Bosco”, den cooperacion estrecho cu YMCA y tambe Piscina Olimpico Roly Bislick. Un facilidad na unda por acomoda deportista/estudiante, riba invitacion di asociacion of clubnan deportivo, pa bin haci nan training di beisbol, basketball, volleyball, natacion aki na Aruba, pa di e manera ey “cater” un grupo di turismo nobo.


“Nos meta ta pa crea desaroyo economico na San Nicolas, y trece progreso pa habitantenan di San Nicolas”.

Nos meta ta pa crea desaroyo economico na San Nicolas, y trece progreso pa habitantenan di San Nicolas y vecindario.

MEHORA CUIDO DEN AREA DI SALUD, NOS PRIORIDAD!

Cuido di salud di e ciudadano a bay atras considerablemente, y e confiansa den nos sistema di salud ta decayendo. Institutonan cu mester brinda servicio di salud ya no por cu e demanda debi na crecemento di nos poblacion. Complejidad di e tratamentonan medico ta aumenta innecesariamente debi na e falta di atencion na tempo.

E realidad cu nos ta bibando aden awor ta cu un pashent mester warda varios luna pa haya cita cu su especialista of yega pa haci su testnan diagnostico (manera CT Scan of MRI). Algun no ta logra warda asina tanto y ta empeora cu nan salud of perde e lucha cu nan enfermedad prome cu e dia di nan cita yega.



Prevencion ta e solucion pa cuidu di salud y especialmente e costo di cuidu di salud riba termino largo. Esey ta e motibo pa cual nos ta pone prioridad na prevencion.

Cancer ta un enfermedad cu ta toca tur famia. Estudionan di Pan American Health Organization (PAHO) ta demostra cu cancer y enfermedad cardiovascular ta e prome causanan di mortalidad riba nos isla.

Nos tur por ta di acuerdo cu e ta un enfermedad hopi cruel. P'esey MEP ta di acuerdo cu mester desaroya estudionan riba origen di e indicenan di cancer.

Mester haci comparacion cu paisnan den region y asina aki, introduci metodo di accion pa preveni y trata cancer riba nos isla. Unabes cu nos conoce e causanan cu tanto hende na Aruba ta sufri di cancer, nos por enfoca mas directo riba preveni y trata cancer.

Nos ta compronde cu factornan genetico ta hunga un papel importante den e desaroyo di cancer pero tambe mester pone atencion riba 'estilo di bida', nutricion y obesidad.

IMSAN lo wordo desaroya den un centro oncologico y lo haya aparatonan moderno pa combati e enfermedad di cancer efectivamente.

Di e forma aki nos kier fomenta desaroyo na San Nicolas pa atrae tambe turismo di salud, y asina amplia nos pilarnan economico y trece desaroyo real pa San Nicolas.

Sinembargo e forma mas eficaz pa combati cancer ta keda PREVENION: ehercicio, movecion, come saludabel, y biba saludabel ta clave.



MEP tambe ta preocupa cu cuidu y atencion pa cu nos grandinan. Mundialmente un averahe di 14% di e poblacion riba 65 aña ta sufri di problemanan neurocognitivo, cu por conduci na perdida di memoria.

Na Aruba e cantidad di personanan riba 65 aña lo aumenta na 2030 compara cu 2015 y consecuentemente e cantidad di personanan cu problemanan neurocognitivo tambe por aumenta pa 2030.

PAHO y WHO ta aplicando un “Health Agenda for the Americas 2008-2017” pa sigura e calidad di bida di personanan di 65+ door di duna e cuidu necesario riba termino corto, mediano y largo.

Tin fondonan cu ta disponibel door di PAHO y WHO pa entre otro desaroya plannan nacional.

Pa nos di partido MEP salud di hende y sigur bida di hende no tin prijs.

Nos ta consciente cu un pais cu ta respeta su mes, mester brinda un cuidu di salud digno na su ciudadanonan, y cu esey nos ta compromete: mehora e calidad di cuidu pa un y tur. Prevencion y movecion ta e solucion.

PROPOSICIONNAN PA RESOLVE PROBLEMANAN DEN CUIDO DI SALUD:

EHECUTA PLAN NACIONAL DI PREVENCION (PNP)

Nos lo enfoca mas riba un plan di prevencion proactivo, na unda ta pone enfasis tambe riba educacion y informacion riba plannan di ehercicio (movecion) y nutricion (alimento saludabel), y introduci sistema di chequeo obligatorio (incluyendo chequeo dental).

Prevencion proactivo ta crea e posibilidad pa detecta un cantidad significativo di enfermedad como tambe adapta un miho estilo di bida na tempo.

E concepto di prevencion lo duna su fruto disminuyendo e tendencia di e gasto medico a largo plaso. E implementacion di medicina preventivo ta bay drenta manera un rescate pa e cuidu medico actual cu ta basicamente curativo.

Aruba su poblacion actual ta duna e capacidad pa por tin un control preventivo pa henter e comunidad. Ehecutando e plan aki nos ta preveni un gran mayoria di enfermedadnan cronico cuminsando na enfermedad cardiovascular por ehempel.

MEP kier adapta y uza e areanan di MFA (Area/Edificio Multifuncional/Hulpbestuurskantoor) na Noord, Paradera, Sta. Cruz y Savaneta pa crea Puntonan di Control di Medicina Preventivo (PCMP).

E lugarnan aki lo brinda e capacidad pa realiza control y screening preventivo cu medico general y nutricionista.

Esaki ta trece cuidu medico mas cerca di cas y tambe ta duna mas oportunidad pa conta cu mediconan disponibel pa facilita e bishitanan na cas (cuidu medico na cas) pa e pashentnan cu tin problema cu movilidad (pashent na cama of den rolstoel).

Esaki tambe ta facilita e acceso y ta mehora e atencion pa e cuidu medico pa nos grandinan.

Prevencion ta cuminsa cu educacion na unda ta importante pa ehecuta programanan di prevencion na scol. Pa medio di charla educativo y interactivo cu ta involucra, educa y encamina e hobennan pa cu un estilo di bida saludabel.

Enfoke y digitalisacion di e problemanan di salud den nos poblacion (Sobre Peso, Obesidad, Hipertension, Diabetes, Nutricion, Cancer etc.)

Ta importante den e momento di control preventivo pa tuma registro di datonan importante y acumula nan den un solo sistema electronico pa crea un base di dato di nos poblacion riba un nivel nacional (tambe ta inclui informacion di nutricion y estilo di bida).

Esaki ta bay brinda nos e capacidad pa por resalta otro enfermedadnan of comportacion socio-cultural importante cu porta nos ta lagando afor di enfoke y cu lo tin mester di atencion (esaki ta crea caminda pa futuro creacion di programanan mas enfoca pa nos necesidad como comunidad).

MAS ENFERMERO, DOKTER DI CAS Y ESPECIALISTA

Pa cada ciudadano haya e oportunidad di un atencion medico specializa y rapido, lo amplia e cantidad di enfermero y persona cu ta traha den e area di cuidu, y brinda nan condicionnan di trabao atractivo; lo stimula nos hobennan pa scohe e especializacion aki.

Nos lo soluciona e problema di nos studiantenan di medicina cu ta studia den region. Na e momentonan aki riba cada 1500 pa 2000 pashent tin un dokter di cas. Na Belgica por ehempel tin tres dokter di cas pa cada 1000 pashent. Nos mester mehora e sistema na unda actualmente tin un escasez di dokter di cas cu tin como consecuencia cu esnan cu t'ey casi no tin tempo pa atende nan pashentnan.

Extende cuidu medico cu profesor of grupo di medico especialista for di Colombia y/of Venezuela, procedente di clinica cual nos tin un relacion di trabao caba, pa atende y/of opera pashentnan cu regularmente lo wordo manda pa cuidu medico den exterior.

Esaki tambe ta yuda reduci y alivia e problema di lista di espera largo. Esaki lo trece un disminucion of lo elimina por completo e lista di espera pa cu especialista y tratamiento den hospital como tambe amplia y reforza e conocimiento pa e manejo di pashentnan di alta complexidad.

E brigada di salud aki mester bini Aruba, na un manera organiza y estructura, na unda hospital lo ta central den esaki hunto cu nos mediconan local pa garantiza e apoyo medico pa nos ciudadanonan.

Nos mester haci nos hospital e instituto na unda tur procedura lo por ser haci, eliminando y bahando di tal manera e cantidad di pashentnan cu mester bay afor pa tratamiento medico.

AUMENTA PRODUCTIVIDAD DI HOSPITAL PA LOCUAL TA LABORATORIO/RÖNTGEN AFDELING/SALA DI OPERACION.

Intencion ta pa pone e salanan funcional durante 12 ora pa dia, haciendo nan mas productivo y asina duna atencion na mas hende posibel durante un dia. Percura pa e tecnologia den e area medico yega nos pais y haci hospital competitivo y productivo vs. otro hospitalnan den region. Un berdadero sistema medico di calidad.

MEDICONAN YIU DI TERA

Reconocimiento y Aprecio pa nos Profesionalnan Arubiano den area di salud cu a studia den Region, Merca y Europa.

E profesionalnan Arubiano den area di salud ta importante pa inclui den nos sistema di salubridad actual pa sobra nan ta bay reenforza e cuidu medico en general.

Cu nan inclusion den e sistema di salud ta bay bin e reduccion den e lista largo di espera pa medicina general, medicina familiar y medicina specializa.

Pa haci esaki un realidad mester implementacion di un sistema pa registra y valida nos profesionalnan di salud di Aruba pa Aruba.

E asunto di evaluacion di diploma mester di un analisis completo y profesional, pa garantiza e calidad di cuidu. Nos lo cuminsa door di introduci un Aruba-BIG similar na locual a ser haci na Corsou.

Esnan cu a studia den region lo wordo emplea bou supervision y si ta necesario lo laga nan haci nan "internship" na hospital posiblemente na "Eerste Hulp" (pareu cu e entrenamiento como "basis-arts"), pa di e manera ey tambe e servicio aki mehora y elimina e tardanza existente. Den cuadro di esaki e ley di AZV mester keda adapta.

ASEGURO MEDICO GENERAL (AZV)



Lo haci un inventario y reestructura e Aseguro Medico General pa e dedica na su funcion, esta, promove salud y manejo di e fondo y contracto di e mediconan nada mas.

Inspeccion di Salud lo ser enforza pa eherce e control necesario den e area di salud aki na Aruba pa garantiza un bon cuidu di salud.

E registro y evaluacion di e mediconan y diploma den region lo ser analiza y soluciona por medio di un comision di experto cu lo duna atencion y solucion na esaki.

Reestructura costo di cuidu di salud y modifica e sistema di AZV, caminda ta necesario ta baha gasto, pero esaki no por afecta e calidad di cuidu di salud di e ser humano y cambiando e enfasis na cuidu di salud curativo gradualmente pa cuidu di salud preventivo.

BAHA GASTO DI CUIDO MEDICO DEN EXTERIOR

Fortalece cuida medico na cas cu inversion na Aruba di ekipo y trece medicina capacita (specialisa) pa logra haci mas procedimiento/cirugianan medico riba nos Isla (Brigada di Salud).

Reevalua e sistema di tratamento medico den exterior, eherciando mas control y inspeccion den area di facturacion di clinicanan den exterior cu na mes momento ta baha e gastonan di cuida medico.

INTRODUCCION DI MAS CENTRO MEDICO Y DI DIAGNOSTICO RIBA NOS ISLA

Cuminsando cu un upgrade di Centro Medico San Nicolas y haci'e un hospital; riba termino largo mester tin un Centro Medico y di Diagnostico den cada districto, cuminsando den e area central di Aruba (Paradera/Santa Cruz) cu posibilidad di haci dialisis y asina trece e cuida medico mas cerca di e ser humano.

AMPLIA OPORTUNIDAD PA INVERSION PRIVA Y CREA MAS CLINICA PRIVA NA ARUBA

Esaki ta crea mas opcion pa e comunidad di Aruba pa cu nan cuida medico y ta crea competencia sano cu ta incrementa calidad den Salubridad.

CUIDO MEDICO PA NOS GRANDINAN

Mester cuminsa pa separa cuida di salud di adulto mayor di cuida di salud general. Esaki ta bay trece mas atencion y dedicacion pa cuida medico pa nos grandinan.

Relaciona cu e problemanan di esnan cu ta sufri di perdida di memoria:

Prepara un Plan Nacional pa enfrente e aumento drastico di esnan cu ta sufri di perdida di memoria.

E prome paso cu mester tuma ta di haci investigacion pa identifica ki maneho ta bay hiba y kico ta e obhetivonan y cambianan di maneho existente cu ta forma parti integral di un Plan Nacional.

E Plan Nacional mester defini e asina yama "care pathway" den cual ta stipula con lo atende e problema aki y con ta coordina ehecuacion di e plan. Tuma accion contra "Neuro Cognitive Disorders".

AREA DI INSPECCION DI MEDICAMENTO

Fortalece direccion di Inspeccion di remedi y Departamento di higiena cu un laboratorio kimico cu ta garantiza calidad den nos medicamento cu ta drenta Aruba of ta ser traha na Aruba mes.

E laboratorio tambe tin e capacidad pa haci otro testnan cu tambe ta necesario manera test pa cuminda, awa y esaki tambe por garantiza control di zonanan di riesgo, por ehempel den medio ambiente.

REINTRODUCCION DI MEDICAMENTO NA NO-GENERICO DI MARCA PA TRATAMIENTO DI ENFERMEDAD NA CRONICO MANERA DIABETES Y HIPERTENSION

Maneho responsabel riba uso di remedi generico y no-generico den caso di pashentnan cu enfermedad cronico, cu mester haci uso di remedinan no-generico pa asina garantiza e salud di nos poblacion den 15 aña y mas.

EVALUA LEGALIZACION DI UZO DI MARIHUANA MEDICINAL

Actualmente gremio medico ta reconoce varios beneficio pa cu e uso di marihuana medicinal. Mehora calidad di bida den pashentnan di cancer por ehempel ta un di nan.

Nos ta mira avancen grandi den area di epilepsia, anorexia, glaucoma y maneho di dolor cronico.

Mester reconoce tambe cu tin un indice halto di automedicacion den nos poblacion y mester sigura cu e productonan cu ta ser utiliza ta indica pa e enfermedad, ta receta door di un medico y cu e producto ta di calidad, semper buscando e bienestar di e pashent.

SALUD MENTAL

MEP ta reconoce cu salud mental ta importante. Ta necesario pa expande cuida di enfermedad mental y amplia capacidad di cuida pa e pashentnan aki.

- A corto plazo mester haci un estudio nacional riba e tereno di salud mental y su relacion cu adiccion na Aruba. A base di e resultadonan aki lo implementa un plan di maneho concreto riba e tereno aki. Esaki lo mehora e cuida riba salud mental y adiccion.

- Na aña 1987 PAAZ a bay den funcion cu 40 cama. Awe na 2017 ainda PAAZ tin e mesun cantidad di cama siendo cu nos poblacion a redobla. PAAZ mester keda amplia y fungi como un Psychiatrische Ziekenhuis.

E ampliacion lo mester ta den e siguiente seccionnan:

- Kinder & jeugd psychiatrie
- Forensische psychiatrie
- Geronto-psychiatrie (Alzheimer, demencie, cognitieve gedragsstoornissen onder ouderen).

Actualmente SABA ta nenga di tuma e tipo di e clientenan aki door cu e personal no tin e conocimiento y/of experticio pa deal cu nan.

Logrando e cambian necesario pa nos sistema di salud y fortaleciendo nos cuida medico na cas, nos ta promove Aruba automaticamente como centro di referencia medico den Caribe. Nos lo por brinda servicionan specialisa manera tratamiento di enfermedad cardiovascular, tratamiento di cancer, centro di tratamiento pa cirugia estetico y centro odontologico. Tur esaki lo contribui na crea un pilar economico nobo, esta turismo medico.

NOS PRIORIDAD PA COMBATI ADICCION

Comunidad di Aruba visualmente por a nota cu e problematica di adiccion a conoce un crecimiento espantoso. Nos ta papia di adiccion ora cu un persona desaroya un comportacion compulsivo (no por sin uzo, no por resisti, no-controlabel) y 100% di su tempo, energia y medionan financiero ta ser gasta na un cierto substancia. Prome cu un persona yega na e nivel ey, tin diferente fase y nos di MEP ta convenci cu e ayudo ofreci tambe mester ta den diferente fase.

Partido MEP ta tuma e problematica aki hopi na serio y mester contraresta esaki di tur angulo y tur nivel.

Nos por a tuma nota di tur locual cu a ser logra cu sosten di Gobierno di MEP, den e ultimo cuatro (4) pa ocho (8) aña a keda “elimina” structuralmente. Lastimamente esakinan no a keda reemplaza cu algo otro.

Nos ta realiza nos mes cu e problematica ta uno bastante complica y cu e solucion ta rekeri creatividad, sosten y energia di hopi, pero mas aun compromiso.



**Stabilidad
familiar
ta nos
Vision!**

Nos lo percura pa e cuido necesario t'ey y cu esaki lo wordo ofreci manera esaki mester ta.

Den e proximo gobernacion nos lo contraresta e problematica riba diferente nivel:

- Nos ta considera adiccion como un enfermedad y lo trata esaki tambe como tal. Prome cos cu lo ser haci ta, trece esaki bek bao Ministerio di Salud, asina nos lo decriminalisa e adicto. Un adicto ta un persona cu ta sufri di un enfermedad y mester wordo trata manera un persona cu ta sufri di un enfermedad.
- Nos lo rebiba y reintroduci e Nationale Drugsraad (Consejo Nacional pa Asuntonan di Droga) riba un plano mas halto hunto cu e 'Coördinatiebureau Drugsbestrijding' y tur entidad cu tabata resorta bao di esaki.
- Coordina e maneho interministerial, interdepartamental; Desaroya e infraestructura necesario y coordina esaki; Reestablece nos lasonan interinsular, regional y internacional.

PREVENCION

- Prevencion lo sosode riba diferente nivel y nos lo hiba esaki riba un nivel mas halto pasobra nos ta convenci cu prevencion ta e yabi pa evita cu e grupo di adicto lo crece.

Nos lo enfoca:

- Riba famia sano como nucleo di un comunidad.
- Recreacion sano den tur area, sea arte of deporte.
- Brinda asistencia real na mayornan soltero y famianan den dificultad.
- Percura pa nan por cubri nan necesidadnan familiar.
- Nos lo instala a corto plaso un grupo di trabao di profesional den educacion, specialisa den curiculo pa scolnan preparatorio y basico pa actualisa y revisa e curiculo cu a wordo desaroya pa Fundacion Anti Droga Aruba (FADA) mas cu dos decada pasa, introduci y implementa esaki dentro di un aña di gobernacion.
- Tambe lo forma un grupo di profesional pa desaroya un curiculo pa scolnan secundario y percura pa esaki wordo introduci y implementa den e di dos mitar di gobernacion.



REHABILITACION

Nos lo percura pa un biaha mas e cadena di cuido den adiccion lo ta e ehempel pa cuido aki na Aruba, manera esaki tabata. Iniciativa priva, iniciativa publico lo wordo reenfora.

E cadena di cuido lo mester trece cu ne, cu esaki lo para e proceso/ciclo di degeneracion mental, spiritual, social y dependencia total cu adiccion ta trece cu ne.

E cadena di cuido mester guia e adicto for di riba caya te na un ciudadano respeta y productivo den nos comunidad.

E cadena di cuido den adiccion lo mester consisti di minimal:

- Consultorio pa Asunto di Adiccion (minimal 3: San Nicolas, Santa Cruz y Oranjestad)
- Instituto pa Adicto Regular (SAMBA/Clinica Mimi Ecury)
- Institucion pa Adicto Ambulatorio (sin lugar fiho di biba)
- Instituto pa Adicto Criminal (Strafrechtelijke Opvang voor Verslaafden)
- Institucion pa persona poni bao di Curatela
- Institucion pa Double/Triple Problem
- Shelter/Inloophuis
- Halfway House (cabayero y dama)
- Threequarterway House (cabayero y dama)
- Institucion pa Hubentud cu problema di drogadiccion

Nos lo reintroduci y actualisa e plan di maneho macro, e asina yama “zandloper-model” utiliza y implementa di aña 1992 pa aña 2012 pa “Drugscordinatie Bureau

Nos lo educa y emplea profesionalnan den e ramo y percura pa tur material y espacio pa nan por traha na un forma respetabel y profesional.

Lo mester introduci un curiculo specifico na tanto Colegio EPI (sector di cuido), como na Universidad (FAS/sociaal/maatschappelijk werker) pa e profesionalnan por brinda e guia y tratamiento cu cada adicto mester. Tambe lo revisa nan beneficiacion secundario den e ramo di trabao aki.

Nos lo reintroduci Opleiding pa Verslavingszorg Therapeut conhuntamente cu nos institucionnan Educativo Profesional y banda di e opleiding specifico aki, tambe lo tin her-, om- y bijscholing di profesionalnan trahando y cu regularmente lo ta den contacto cu e grupo di adicto manera:

- Cuerpo Policial
- Korrektie Instituut Aruba/Instituto Coreccional Aruba
- Enfermeria na hospital/Wit Gele Kruis/PAAZ
- Trahadado Social di Directie Sociale Zaken/Voogdijraad/Reclassering y mas
- Aruba Human Resource Managers
- Cuerpo Especial Arubano y hopi otro institucion di seguridad na Aruba
- Cabesante di scol y grupo di decano na institucionan di educacion

Nos lo adapta leynan na unda esaki lo ta necesario y percura pa ta creativo pa di e manera ey por brinda ayudo na e grupo di adiccionan. Lo utiliza leynan di e Codigo civil te cu e Codigo penal p.e.;

- Ley di ponemento bao di curatela.
- Suspende castigo y ofrece alternativa pa mehora bida. Restructura OPC unda muchanan menor di edad lo haya un mihor guia y sosten pa evita cu nan ta sigui den e ciclo.
- Nos lo introduci un centro pa famianan den adiccion, unda nan por biba y rehabilita na mes tempo. Asina evita cu e yiunan lo bira victimay cay den e ciclo di adiccion; si mester, nos lo cera convenionan cu institucionnan den exterior pa rehabilitacion.
- Nos lo crea un plataforma (conforme e sugerencia anan di United Nations Drugcontrol Program) pa tur departamento di gobierno cu ta trata cu e problema di adiccion, un netwerk di departamentonan social, enseñansa y salud, pero tambe hudicial, pa evita cu un persona ta perde den e sistema.

E problema aki ta trata diferente disciplina, por ehempel, un trahado social ta atende un famia, den e famia tin problema cu adiccion, e problema ey tin di wordo treci den un plataforma nacional pa cada disciplina por atende cu e caso riba nan turno pa e caso no muri te na ayudo social.

Nos lo lucha pa yuda cada adicto kibra cu nan adiccion, y preveni cu mas hoben ta cay den adiccion.

MANEHO DIRIGI RIBA ENSEÑANSA Y EDUCACION DI CALIDAD

Enseñansa ta ocupa un funcion cardinal den desaroyo di un pais. Enseñansa mester ofrece tur hende espacio pa nan por desaroya tur conocimiento, habilidad y actitud cu nan mester, pa nan por funciona bon y logra exito den nan bida. Ta importante pa henter comunidad y sector di enseñansa en particular haci su maximo esfuerzo pa sigura cu cada ciudadano por siña durante henter su bida y asina desaroya y progresa. **Nos meta ta: mas graduado, menos “dropouts”.**

Hunto lo mester hisa e balor y aprecio pa enseñansa den nos comunidad. Lo cultiva un ambiente di concientisacion pa tanto mayor, e bario, instancianan social y educativo y comunidad en general, sostene e scol den su tarea importante di educacion y enseñansa di nos futuro generacion.

Un pueblo educa ta un pueblo cu vision y futuro. Educacion ta e forma mas efectivo pa combati pobreza y problemanan social y trece desaroyo economico.

| CALIDAD DI ENSEÑANSA

Enseñansa mester brinda e alumno e oportunidad pa e por desaroya su mes den un forma optimal. Esaki mester sosode den un ambiente sano y sigur. Mester tene cuenta cu e habilidad y talento di cada alumno. Pa por brinda un enseñansa optimal mester percura pa e condicionnan necesario t'ey.

Pa por logra esaki e siguiente aspectonan lo tin prioridad den e proximo gobernacion:

| MANEHO DI IDIOMA

- Duna e ortografia di Papiamentu adapta su base legal via nos parlamento. E maneho di idioma Papiamentu mester wordo defini basa riba e resultadonan di e proyecto piloto “Scol Multilingual” na scolnan basico.

Na momento di e implementacion di Papiamentu na scolnan, mester aloca fondonan pa por realiza esaki.

Den e maneho di idioma lo evalua introduccion di “prisma-project” pa tur mucha na tur scol basico.

- Percura pa tur mucha tin e mesun oportunidad pa comprende e materia duna na scol.



Un pueblo educa ta un pueblo cu vision y futuro.

| CURICULO ACTUALIZA


- Curiculo basa riba e habilidadnan necesario (“skill based”) pa por funciona den comunidad y mercado laboral.
- Introduci un curiculo nacional cu material interactivo, yamativo y textualmente na e situacion di Aruba, cu ta core di e nivel preescolar te na e nivelnan mas halto di enseñansa pa adulto.
- Amplia e curiculo cu formacion ciudadania, historia di Aruba y e lucha pa Status Aparte.
 - Tambe habilidad pa ta proactivo, forma y defende propio opinion y cuminsa mesun negoshi.
- Dirigi tur nivel di enseñansa profesional riba necesidad di trabao na Aruba.

CREA CONDICIONNAN

- Cumpli cu 7% di GDP dedica na enseñansa, 1% mas cu lo cual UNESCO ta pidi tur pais pa aloca, pa logra e meta: redobla e cantidad di graduadonan HBO y WO.
- Studia y actualisa leyman riba tereno di enseñansa pa ta asina mas aplicabel na enecesidadnan actual. Pa asina ofrece e base legal specifico pa innovacion.
- Amplia e asistencia social na scolnan y traha riba e conscientisacion cerca alumnonan tocante enseñansa civico dirigi riba conservacion di norma y balornan.
- Duna guia extra na studiantenan cu ta core riesgo pa asina evita e fenomeno di “drop outs” (haci uzo di trahado social y considera programa di prisma si ta lenguahe ta e problema).
- Stimula un bon relacion entre scol y mayor, comunidad y instancianan cu ta sostene y maneha enseñansa.
- Evalua y monitoria e calidad di enseñansa continuamente y adapt’e unda ta necesario.
- Stimula tur actor den enseñansa pa traha hunto na calidad di nos enseñansa.
- Optimalisa sistema di cuido di calidad den enseñansa.

AMPLIA AYUDO Y SOSTEN NA DOCENTENAN

Docentenan cu ta traha tur dia directamente cu alumnonan mester tur ayudo y sosten pa nan por cumpli cu nan trabao debidamente. Nan trabao ta di suma importancia pa e exito di nos alumnonan.



Pa por logra esaki e siguiente aspectonan lo tin prioridad:

- Recapitacion y guia continuo y practico di Cablesante-/ Director- y maestronan segun nan necesidad y tambe desaroyo den enseñansa.
- Crea un plataforma caminda por comparti y siña di otro.
- Amplia e cuido pa maestronan.
- Percura pa e docentenan tin e condicionnan necesario pa por ehersce nan trabao manera mantene tur scol preparatorio y basico na cantidad maximo di 27 alumno pa klas (preferiblemente uza 22 alumno pa klas como norma).
- Percura pa tur scol tin WiFi gratis y materialnan pa duna les cu ta bay segun tempo manera digiboards etc.
- Amplia profesionalismo riba tereno digital di nos maestronan.
- Duna reconocimiento pa esfuersonan haci den enseñansa y comparti esakinan cu otro scolnan como “best practices”, pues siña di otro.
- Duna participacion real na maestronan den mehoracion y innovacion den enseñansa.
- Percura pa tur scol tin un “zorgteam” (posiblemente cu trahado social) cu por asisti e maestro debidamente.
- Amplia e uzo di asistente di klas unda esaki ta rekeri. E asistente lo haya un educacion pedagogico/didactico.
- Busca mas maestro pa reemplazo di un maestro cu ta malo.

INFRASTRUCTURA

Pa por siña, un alumno mester por traha den un ambiente sigur y sano. Esaki ta conta tambe pa esnan cu ta traha na scol. Mester tin suficiente scolnan pa tur nos alumnonan na Aruba.

Pa por logra esaki e siguiente aspectonan lo tin prioridad:

- Mehora e infraestructura y haci mantencion structuralmente na scolnan, pa garantisar tur scol un edificio sano y moderno.
- Percura pa nos alumnonan y maestronan tin seguridad den nan ambiente social y emocional na scol, liber di droga, alcohol, violencia y intimidacion.
- Lo pone e fondonan necesario pa construi e MAVO-HAVO-VWO na Noord.
- Lo bini cu un sistema efectivo caminda kehonan di mayornan, docente/cablesante ta wordo considera pa asina haci mehoracion a corto plaso.

ENSEÑANA ACCESIBEL PA TUR HENDE



MEP lo traha pa tur hende por gosa di nan derecho di por ricibi enseñansa pa asina nan ta exitoso den nan bida y contribui na e desaroyo di nos pais.

Pa por logra esaki e siguiente aspectonan lo tin prioridad:

- Asistencia financiero pa studiantenan cu no por cumpli cu e peso financiero di e estudio.
- Cumpli debidamente cu e financiamiento di scolnan conforme e leyman vigente, pa evita cu scolnan mester cobra mayornan contribucion halto.
- Revisa e sistema di otorgacion di fianza di estudio actual, y dirigi esaki mas tanto posible riba e necesidadnan riba nos mercado laboral, y garantizando asina e estudiante empleo na Aruba despues di su estudio, den e ramo cu el/a studia.
- Brinda studiantenan fianza di estudio sin interes, pa estudionan avansa.
- Amplia educacion profesional pa adulto, drop-outs, hobennan cu a cay den man di husticia y hende special.
- Duna oportunidad pa studia online y reconoce e estudionan aki. Involue nos profesionalnan cu ta biba afor pa medio di programan innovativo y educativo pa asina nan por contribui cu conocimiento, experticio y guia ("mentorship") na hobennan profesional local y 'entrepreneurs' local.

REFORMA ENSEÑANSA

- Cambia estructura di curiculo y orario di scol.
- Introduci 8 "examenvak" pa tanto VWO, HAVO como MAVO y cambia e sistema di evaluacion y puntuacion di cifra pa letter similar na e sistema.
- Amplia e cantidad di facultadnan tanto na EPI como na Universidad di Aruba y crea mas facilidad pa studia na Aruba mes.
- Nos mester focus riba nos scolnan/institucionan di enseñansa superior aki na Aruba mes y traha hunto cu universidadnan den exterior riba tereno di e-learning.
- Logra haya acreditacion internacional pa Colegio EPI como instituto na unda por finaliza un estudio cu un Associate Degree den tur ramo.
- Y evalua un Bachelors Degree program den e ramonan di Nursing (cuido medico) y "Information and Communication Technology", Civil/Electrical/Industrial Engineering (bouwkunde/wertuigbouw-kunde/informatica/electrotechniek) y "Data Science", cu ta ramonan di estudio cu Universidad di Aruba no ta ofrece na nivel di "Bachelors". Busca cooperacion riba e tereno aki cu University of Curaçao y tambe institucionan na Hulanda.
- Digitalisa Enseñansa; brinda formacion na docentenan na IPA pa prepara nan pa Enseñansa digitalisa/ICT, e ramo cu ta brinda mas perspectiva pa futuro Digitalisacion di Enseñansa.
- Mester introduci internet den tur scol, smart boards/digi-boards, tablets/i-pads.

- Cambia sistemanan actual di Enseñansa profesional (EPB/EPI) y dirigi'e riba necesidad di trabao na Aruba awe, y necesidad den futuro teniendo cuenta cu avancen tecnologico.
- Institui un Fondo Nacional pa Innovacion di Enseñansa, banda di e fondo di Enseñansa regular.

ORARIO DI SCOL

Amplia e orarionan di scol y duna materianan manera arte, musica, arte visual y deporte den oranan di despues di merdia.

Tambe lo siña e alumno con pa argumenta/debati, pa siña con pa defende su mes (pa alumnonan di scolnan basico).

Facilita huiswerk begeleiding, musica, pintamento, baile, teatro, futbol, basketball, baseball, volleyball, atletiek, arte martial etc.

Bini bek cu Olimpiada Inter Escolar y otro tipo di deporte cada aña (campeonato di basketball, futbol).

STRATEGIA PA ELEVA CALIDAD DEN ENSEÑANSA Y DUNA UN ESTIMULO EFECTIVO DEN EDUCACION:

- Duna Departamento di Enseñansa e maneho di nos Enseñansa bek, pa asina logra un “top-down effect”. Nos lo ekipa cada departamento pa por traha efectivamente, ekipa Departamento di Inspeccion pa por supervisa e calidad di enseñansa miho, mehora funcionamiento di e departamento curricular y introduci un departamento di IT pa cuminsa e proceso di modernisacion di enseñansa, y specialmente pa prepara e docente pa duna les den e era digital.
- Brinda mas asistencia social (mediante trahado social) na tur scol pa atende cu problemanan social y pa brinda mas seguridad na alumno y docentenan. Asina e docente lo tin mas tempo pa por duna les.
- Atencion special lo wordo duna na un maneho nacional riba ‘bullying’.
- Busca mas maestro pa reemplaza un maestro cu ta malo, y haci mas uzo di un asistente den klas unda esaki ta rekeri.
- Lo bin cu supervision y control di e crechenan pa garantisa educacion di calidad for di edad ya di infancia y lo yuda mayornan cu no tin modo financiero, cu un ayudo social pa por paga e creche.
- Scol Preparatorio, percura pa mas uzo di digitalisacion den enseñansa preparatorio, y percura cu e kleuter por gosa di tur facilidad pa por move y pa tin un klas safe y atractivo.
- Mehora calidad di Enseñansa na scolnan basico y introduci material interactivo, yamativo y contextualisa na e situacion di Aruba.
- Mehora calidad di Enseñansa na scolnan special, amplia e capacidad na e scolnan, y ekipa e scolnan special cu maestro pa e grupo di alumnonan special, cu multiple deficiencia, entre otro muchanan autista y muchanan cu tin deficiencia motriz, sensomotriz y ta parcialmente fisico limita.

MEHORA CALIDAD DI ENSEÑANSA DEN SCOLNAN SECUNDARIO Y AVANSA:

- Traha riba e motivacion di docentenan y brinda cursonan di recapitacion pa docentenan.
- Traha riba e motivacion di e studiantenan pa combati e fenomeno di “drop outs”; aki mester evalua metodonan mas moderno, manera tablets, digiboards.
- Moderniza curiculo di enseñansa pa prepara nos muchanan y hobennan pa empleonan di futuro cu no ta existi awe y ekipa nan cu e ‘skills’ cu nan mester pa por ta exitoso den un futuro avansa cu ta draai riba y rond di tecnologia y informacion (“data”).
- Amplia cupo na scolnan MAVO/HAVO/VWO, pa medio di construccion di e scol MAVO/HAVO/VWO na Noord, un scol MAVO na Paradera y riba termino mediano un scol MAVO den e area di Savaneta/Pos Chikito.

- Sigui eleva e calidad di e producto di IPA y prepara studiantenan di IPA pa por integra den e mundo di nos hobennan.
- Crea mas posibilidad di estudio na Aruba specialmente pa esnan cu no por bay sigui studia den exterior, y esnan cu awor no ta logra e normanan cu por ehempel EPI ta impone pa por continua un estudio eynan.
- Sigura cu studiantenan bolbe Aruba bek despues di nan estudio.
- Evalua pa otorga fianza di estudio pa estudionan cu cual e estudiante por traha y tin trabao p’e despues di bolbe Aruba; esaki ta exige un estudio elabora di e necesidadnan riba mercado laboral riba termino corto y termino largo, pa asina brinda perspectiva na e studiantenan.
- Duna incentivo adicional na studiantenan cu bay studia den region.
- Facilita e estudiante pa percura cu e ta caba di studia na tempo.
- Garantisa nan e trabao cu nan a bay studia p’e, bao condicion cu nan termina nan estudio na tempo.
- Duna fianza di estudio liber di interes.



NOS PRIORIDAD PA DESAROYA DEPORTE

Un hecho importante a sali di investigacion haci cu ta indica cu hopi hoben ta cay den criminalidad pa falta di recreacion sano cerca di nan cas. Pesey nos lo bin cu programanan recreativo, y stimula deporte escolar for di cual bo ta mira e talentonan cu Aruba tin. Tambe mester reinstitui IDEFRE y pone traha na bienestar di deporte escolar y movecion saludabel pa Aruba completo. Nos lo renegocia e contracto cu gobierno a firma cu Lotto pa Deporte, y den cual a entrega nos loteria nacional na Canada, y tuma bek nos loteria di pueblo.



E ganashi genera pa Fundacion Lotto pa Deporte lo bay bek den deporte. Tur organizacion deportivo, scolnan y hasta organisacionnan cultural, social y educacional sin distincion lo conta atrobe riba un aporte financiero y material di Lotto pa Deporte.

E tempo cu deportistanan mester bende rifa y recauda fondo pa por representa Aruba den exterior, lo pasa pa pasado. Mester mehora infraestructura escolar y brinda scolnan material adecua pa deporte.

Lo construi un Sport Hotel na San Nicolas, cu lo wordo utiliza pa hopi mas deporte na Aruba en general y special rond di San Nicolas.

Training lo eleva nos nivel di deporte, hobennan Arubiano por wordo selecciona pa participa na deporte den exterior, hobennan Arubiano por ricibi beca deportivo for di Universidadnan den exterior a base di nan prestacion deportivo. Atractivo di esaki lo ta, cu nan lo por train cu Aruba su seleccionnan deportivo.

OBHETIVO PA YEGA NA UN PROGRAMA RECREATIVO:

MOVECION MAS ACCESIBEL PA UN Y TUR DEN BARIO

- Activa Centronan di Bario pa brinda recreacion sano pa chikito y grandi, cu programa di beca deportivo y cultural den bario.
- Construi canchanan multifuncional den diferente bario.
- Combina parkenan cu lugar di cana, core, core bicicleta etc y pone e "Obstacle Course" den combinacion cu esaki of ta bin cu esaki riba su mes unda cu gruponan por train y por organisa esaki y haci hasta esaki como un evento internacional.
- Traha riba mas camindanan pa cana, core y bicicleta
- Promove movecion pa grandinan bao encargo di personanan diploma.
- Promove deporte pa esnan deshabilita y personanan special.

OBHETIVO PA REBIBA DEPORTE ESCOLAR:

- Brinda scolnan mas material pa por practica deporte y movecion sano, ademas di un gymzaal adecua.
- Tur scol mester tin un docente di deporte, unda cu esaki ta responsabel pa tur actividad di deporte y movecion.
- Reintroduci Olimpiada Escolar y promove tur scol pa participa y cu premionan mester ta mas atractivo.

NOS PRIORIDAD TA PA STIMULA Y PROMOVE DEPORTE COMO RECREACION SANO PA NOS HOBENNAN!



DEPORTE PRIORIDAD DI MEP

- Restructura instituto deportivo IBISA (IDEFRE) y dividi esaki den dos seccion:

Seccion di deporte escolar y seccion pa salud y movecion sano.

Scolnan mester bay hunga un rol importante den movecion y comemento saludabel. Mester crea un curriculo pa esaki.

- E ‘speelplaatsen’ mester tin e infraestructura pa tin diferente weganan cu hobennan por hunga den pauze.
- Introduci categoria A y B, pa esnan cu ta participa den A ta esnan cu ya ta practicando e deporte den un organisacion oficial y esnan den categoria B ta esnan cu no ta inscribi den ningun club.
- Percura pa mehoracion di gymzaalnan cu ta den mal estado.
- Scolnan cu falta un gymzaal mester percura pa nan por tin di nan mes.
- Mehoracion y estructuracion di organisacionnan.
- Hopi organisacion ainda, pa falta di experiencia, no ta funciona manera debe ser. E organisacionnan aki mester di ayudo y aki unda lo forma un grupo cu e experticio necesario pa yuda nan pa estructura miho y asina e organisacionnan por tin continuidad.
- Cursonan pa coachnan ta algo cu tin di bira anualmente y unda ta ser controla si locual ser siña ta ser implementa. Nos lo busca coachnan cu experiencia y sigur den nos mesun region pa por realiza esaki.

Promocion y transmision di wega y eventonan deportivo y reconocimiento di atletanan a corto plazo:

- Promocion di deporte ta un obligacion unda cu mas hende lo por atende weganan.
- Transmision di weganan y sigur eventonan deportivo lo ser transmiti.
- Reconocemento semanal pa atletanan di tur deporte. Pa stimula e muchanan pa haci lo maximo pa por ta e deportista di siman.

OBHETIVONAN PA STIMULA PA DEPORTE ORGANIZA, FEDERACION Y ORGANISACIONNAN DEPORTIVO:

- Gobierno mester traha mas cerca di e organisacionnan deportivo, y percura cu cada organisacion ta uno democratico, unda miembronan di nan directiva ta cambia segun nan statuto y unda tur e miembronan cu ta practica e deporte en cuestion ta sinti nan mes representa. Alabes brinda aporte pa Federacionnan renoba nan statutan cu ta hopi anticua.
- Nos seleccionnan nacional mester ta den movecion henter aña y mester ricibi cooperacion y sosten financiero di gobierno y caminda ta posibel di doño di trabao pa por entrena y representa Aruba dignamente.
- Promove e lidernan deportivo, entrenadornan etc. cu cursonan via e federacionnan mes. Mas entrenador diploma ta yuda hisa e nivel di deporte.
- Canchanan deportivo existente lo mester haya ayudo pa mantencion pero tambe e upgrade necesario manera iluminacion.
- Construi un ‘track and field’ pa San Nicolas pa practica atletismo, y construi un piscina Olimpico den e area central di Aruba (Paradera/Santa Cruz), como tambe un velodrome pa ciclismo riba termino largo.
- Atencion pa cuido medico, specialmente pa nos atletanan.
- Guia nos hobennan pa nan por drenta scolnan na otro paisnan unda nan por sigui studia y practica deporte.
- Stimula weganan interinsular, y sondea e posibilidad pa reintroduci e Weganan di Reino.
- Asigna un tereno suficiente grandi pa por crea diferente parke pa deporte extremo, entre otro skate board, motor cross, bike cross y drifting.
- Brinda ayudo na deporte di Drag Race cu actualmente no ta wordo reconoci e.o. pa Subsidie Commissie.
- Renoba veld di Kudawecha den un standard internacional pa weganan di softball y baseball Little league.
- Renoba e veld di Little league na Dakota.

MANEHO SOCIAL

HUBENTUD/ HENDE MUHER/ADULTO MAYOR

Pobresa a crece exponencialmente den nos pais den e ultimo añanan. Centenares di mucha ta haya desayuno danki na Fundacion Ban Uni Man pa nos Muchanan y miles di persona ta depende di Fundacion pa nos Comunidad pa por haya cuminda riba mesa, di cual mitar ta mucha. Pobresa ta trece cu n'e hopi problema social, den cual esnan mas vulnerabel den nos comunidad ta sufri, nos muchanan, mamanan soltero y nos grandinan.



Cu e rapport recién di Unicef a keda prueba cu derechonan di mucha na Aruba ta wordo viola, algo cu ta totalmente inaceptabel. 1 di cada 10 yamada na Telefon pa Hubentud ta relata na abuso domestico y/of sexual, y apesar cu a papia hopi riba combatimento di e abuso aki, de facto no mucho a wordo haci den e ultimo añanan. Di otro banda e castigonan den caso di abuso sexual ta varia hopi y den gran mayoria di caso, nan ta demasiado abao.

Nos hobennan a wordo negligisha den e ultimo cuatro añanan y consecuentemente e posibilidad di desaroyo y di acceso na recreacion, practica un deporte y desaroya talento pa medio di diferente manifestacion artistico y cultural, a wordo disminui.

Mama y tatanan soltero mester lucha contra un sistema social burocratico, en bes cu e sistema ta lucha pa nan. Cuido di nos adultonan mayor no ta hayando prioridad y tampoco nan cuida di salud, mientras cu mas y mas e respet pa adultonan mayor ta birando menos.

Den mayoria di caso problemanan social su origen ta den e famia. Problemanan social ta manifesta nan mes tambe den famia. P'esey den e vision di MEP e famia mester wordo poni central, y desde eynan mester atende cu tur tipo di problema social. Problema di muchanan negligisha y abusa, di hobennan problematico, mamanan soltero, famianan, y cuida di nos grandinan.

Bo no por atende cu problema di hobennan problematico, sin atende cu e famia por ehempel. Bo no por atende cu problema di cuida di nos grandinan, sin atende cu problemanan social. Bo no por atende cu problema di abuso sexual, sin atende cu problemanan den famia.

Ademas, nos no tin hopi experto na Aruba, ni tampoco hopi placa. P'esey mester concentra tur conocemento y fondo den un solo ministerio, y asina nos por ta mucho mas efectivo.

Locual ta resalta cada aña tambe ta cuanto problema pensionadonan tin. Hopi pensionado ta haya hopi cobranza bieu pareu, debi cu departamento di belasting tin atrasonan. Pero di un pensioen e no por paga debenan di añanan anterior facilmente. Tambe e echo cu e pensioen ta acumula, y e ora e belasting ta bira un tarifa hopi mas halto.

Nos PRIORIDAD ta pa mehora calidad di bida di esnan mas vulnerabel den nos comunidad!



MEP ta consciente cu nos mester cambia e rumbo aki. Un pais cu ta respeta su mes, no por bira cara pa problemanan social di su ciudadania. Inversion den infraestructura di un pais, no por wordo considera exitoso, si na mes momento ta negligisha inversion den e calidad di bida di ser humano. MEP ta reconoce e importancia di tratadonan internacional y lo traha pa implementa nan, pa asina percura pa ningun hende biba den e margen di nos sociedad.


MEP den gobierno lo ekipa y reforsa tur e departamentonan pa nan por eherce nan tareanan manera debe ser, y por duna asistencia social na esnan cu tin mester, inmediatamente.

OBHETIVONAN PA RESOLVE PROBLEMANAN SOCIAL EN GENERAL:

- Lo rebaha costo di bida, y lo institui un tarifa social pa awa y coriente; esnan cu no por paga nan cuentanan fin di luna, esaki lo ser coordina pa un fundacion, similar na Fundacion Balansa Nobo cu tabata existi den pasado.
- Lo reevalua e sistema di duna ‘onderstand’; tin hende ta abusa di dje debi na falta di control, mientras tin otro nan cu tin mester di ‘onderstand’ no por hay’e.
- Yuda esnan mas vulnerabel den nos comunidad cu asistencia efectivo y duradero pa nan no cay den mas problema, por ehempel cu pago di cas social, cu pago di awa y coriente.
- Institui un ekipo di trahado social, cu ta mas riba ‘field’ pa por evalua realmente ken tin mester di asistencia social, y den caso cu nan tin mester, nan ta wordo yuda inmediatamente.
- Institui un Departamento di Famia, pa asina traha riba maneho con pa fortifica e nucleo familiar. E departamento nobo aki (cu un presupuesto adecua) entre otro lo guia y controla e funcionamiento di e lugarnan di cuida infantil (creche/kindergarten) y crea lugarnan adicional den cada barrio pa “kinder opvang” y “naschoolse opvang” den cooperacion cu Departamento di Enseñansa y e scolnan den cada barrio.
- E proyecto Trai-merdia tambe lo ser amplia. Tur esaki den cuadro di e masterplan di maneho “Crèche”.

OBHETIVONAN PA SOLUCIONA PROBLEMANAN CU NOS MUCHA Y HOBENNAN:

- A base di un esfuerzo nacional, den combinacion cu e instancianan den sector Social y Husticia, crea programanan dirigi riba hobennan cu problema di conducta violento.
- Enfoca atencion riba e problemanan pa cu alimentacion pa un yiu y e suma di alimentacion.
- Ekipa nos pais cu mas psiquiatra pa mucha y hoben, pa por atende cu e problemanan psiquiatrico den muchanan y hobennan den un etapa trempa y bin cu programanan psicologico, pa yuda muchanan, hobennan y muhernan cu ta victima di abuso di tur tipo.
- Aumenta concientisacion bao di nos hobennan di e consecuencianan di embarazo hubenil.
- Combati abuso sexual di menor cu mas determinacion, door di logra castigonan mas severo pa e abusador sexual.



Pa logra esaki tin cu tuma varios paso:

PROTOCOL:

Introduci un protocolo estricto den caso di abuso sexual di menor y pa brinda miho proteccion na muchanan y sosten na e victima y su famia, y concientisa nos comunidad cu e tipo di abusonnan aki no ta aceptabel y ta wordo castiga severamente; evalua leyman existente pa introduci castigo mas severo den caso di abusonnan sexual contra menor.

ACUMULA PRUEBA:

Percura pa un vertrouwensarts, specialistanan disponibel 24 ora pa dia, 7 dia pa siman, pa tuma e pruebanan di abuso sexual; percura pa suficiente material (“rape-kits”) pa tuma e pruebanan.

INVESTIGACION:

Fortifica KZP cu mas personal, entre otro trahado social y material pa investigacion di casonan di abuso sexual wordo haci efectivamente.

CASTIGO:

Bin cu castigonan mas severo contra abusadornan, entre otro castigonan minimo.

NOS PRIORIDAD PA UN MIHO FUTURO PA NOS HOBENNAN

Nos hobennan tin hopi preocupacion pa enseñansa, recreacion sano y oportunidad pa trabao. Ningun di esakinan a haya su debido atencion durante e gobernacion actual. Demasiado hoben ta “drop out” di scol, y no tin otro perspectiva. E desempleo bao di nos hobennan ta haltísimo.

Hobennan profesional ta preocupa ademas con ta bay paga e debe en conexion cu nan estudio avansa; esaki ta un peso y cu gobierno lo por duna un alivio den esaki. E ta un echo cu mayoria graduadonan ta cuminsa cu un debe debi na fianza di estudio.

Esaki ta un di e motibonan tambe pakico nos profesionalnan yiu di tera ta evalua hopi prome cu bin Aruba bek pa traha despues di termina nan estudio.

Otro preocupacion di esnan cu tin un HBO of WO diploma, no ta haya reconocimiento salarial cu ta coresponde cu nan estudio, cual den mayoria di caso ta un otro motibo cu nan ta keda traha den exterior caminda si ta reconoce e diploma.



**OBHETIVONAN PA
LOGRA UN MIHO FUTURO
PA NOS HOBENNAN:**

- Den enseñansa lo crea mas posibilidad pa estudio y/of curso cu ta di acuerdo cu e demanda riba nos mercado laboral. Lo introduci posibilidad pa studia part-time, tambe via sistema di estudio online cu ta wordo auspacia y subsidia pa gobierno.
- Nos lo atende cu e problema di ‘drop outs’, door di y percura cu tur hoben por logra caba un estudio y introduci un programa di educacion of cursonan pa e hobennan aki. Entre otro, amplia programa actual di Formacion Social pero cu un trayecto despues di e lesnan den kazerne, por ehempel “opleiding en werk kansen”, na tanto EPB como Enseñansa pa Empleo.
- Introduci un centro pa mucha y hobennan cu problemanan social y criminal (amplia y profesionalisa OC cu ayudo di fundacionnan).
- Persigui violadornan di venta di alcohol na menornan di edad cu man duro.
- Mas recreacion sano pa hobennan, entre otro deporte, arte, musica.

PROPOSICIONNAN PA ALIVIA E PREOCUPACIONNAN DI HOBEN PROFESIONALNAN ("YOUNG PROFESSIONALS"):

- Crea oportunidad di empleo of negoshi pa nos hobennan, stimula entrepreneurship.
- Prepara un plan di empleo riba termino cortico y termino largo, ya prome cu scoge e rumbo di estudio, conoce e posibilidadnan di trabao na Aruba; esaki mester wordo actualisa regularmente y mester wordo comparti cu entre otro Arubahuis na Hulanda.
- Yega na areglo pa por alivia e peso di e fianza di estudio; introduci e posibilidad di otorga un fianza di estudio sin cu mester paga interes (“rente-vrij lenen”), y pone incentiva y exoneracion “kijtschelding” pa profesionalnan cu kier regresa Aruba den ramonan cu tin necesidad urgente na Aruba; e incentivanan aki lo ta aplicable pa studiantenan cu mester cuminsa nan estudio ainda, como tambe pa studiantenan cu ya ta studiando caba.
- Implementa mas incentivo pa laga nos profesionalnan bolbe bek Aruba.
- Yega na acuerdonan cu gobierno Hulandes pa establece un sucursal di DUO aki na Aruba mescos cu tin na Corsou, pa por controla DUO mas miho y facilita e proceso di pago.

Nos hobennan ta nos futuro, un futuro cu nos mester construi hunto, cu amplio oportunidad pa nos hobennan desaroya nan potencial.

ACCIONNAN SPECIFICO PA ASUNTONAN CU TA REGARDA DERECHO Y INTERES DI HENDE MUHER

- Introduci un plataforma pa combati discriminacion entre hende homber y hende muher. Punto di salida ta derecho igual, pago igual pa trabao igual y mesun oportunidadnan pa specialidadnan riba tereno di trabao.
- Introduci un protocol estricto den caso di abuso fisico y sexual di hende muher y pa brinda miho proteccion na hende muher y sosten na e victima y su famia; pa conscientisa nos comunidad cu e tipo di abusonnan aki no ta aceptabel y ta wordo castiga severamente; evalua leynan existente pa introduci castigo mas severo den caso di abusonnan fisico y sexual contra hende muher, tambe den matrimonio.
- Aumenta conscientizacion den nos comunidad cu abuso di hende muher, tambe bao di nos hobennan, no ta aceptabel.

ATENCION SPECIAL PA PROBLEMA DI MAYORNAN SOLTERO Y PA PROBLEMANAN DI FAMILIA

- Atraves di trabou social den bario y den centronan di bario, lo yega mas cerca di famianan y problemanan di famia; e trahador social na scolnan, mescos cu e trahador social den bario, lo ta e prome nan pa gara e señal di problema social, y por tuma accion mas trempan, previniendo asina cu e problema ta escala.
- Percura pa e mama of tata soltero tin sosten pa lanta su yiu, den diferente forma: cuido despues di scol pa yiu, 'bijscholing' pa entre otro e mama, e tata y e yiu pa evita cu nan ta keda sin subi e otro nivel den bida, guia financiero pa famia pa entre otro siña e famia con pa biba dentro su Budget.
- Lo reevalua sistema di onderstand pa stimula mama of tata soltero pa reintegra den mercado laboral.
- Lo brinda asistencia pa e mama of tata soltero por yega na su propio cas.
- Fortifica e nucleo familiar y conscientisa famianan pa traha tempo pa e bida familiar, pasobra famia ta e base di comunidad.
- Yega na un convenio cu e instancianan concerni pa crea un programa pa integracion familiar teniendo na cuenta e constelacion familiar.
- Combati violencia domestico y aplica castigonan severo, na mes momento brinda proteccion na miembronan di famia den peligro; brinda ayudo na e agresor na forma efectivo pa evita ripiticion. Pa e motibo aki e instancianan concerni mester haya ayudo real pa por funciona como debe ser.
- MEP den gobierno lo percursa pa consolida tur esfuerzo y atencion y lo duna prioridad na atende e problemanan social. Den e cuadro ey lo crea un Departamento di Famia, bao di cual bo ta pone asuntonan di muchanan, e hobennan, e hende muhernan, e famianan, y nos grandinan pa atende cu e problemanan social mas eficiente. Asina nos lo pone e ser humano central, di berdad.

ATENCION SPECIFICO PA PROBLEMANAN DI ESNAN FISICAMENTE Y/OF MENTALMENTE INCAPACITA

- Crea mas facilidad pa cuido y desaroyo di esnan cu incapacidad fisico y/of mental, y centronan di rehabilitacion cu cuido profesional.
- Elimina discriminacion contra esnan cu un incapacidad na pia di trabao y crea mas oportunidad pa trabao pa esnan capacita pa traha.
- Reevalua sosten financiero y profesional na famianan cu ta cuida un familiar cu incapacitacion fisico y/of mental, y crea mas vivienda adapta pa esnan cu incapacitacion fisico y/of mental.


OBHETIVO PA RESOLVE E PROBLEMANAN DI NOS ADULTONAN MAYOR/PENSIONADONAN:



- Haci mas uzo di experticio y consejo di adultonan mayor den directiva di fundacionnan y stimula participacion riba mercado laboral di adultonan mayor cu por sigui traha despues di edad di pensioen.
- Percursa pa un cuido digno pa nos adultonan mayor den casnan di cuido, y pa esnan cu ta biba na cas. Amplia e casnan di cuido, reevalua e maneho di subsidio, y introduci posibilidad di subsidio pa e adultonan mayor cu ta biba na cas.
- Institui un comision di supervision pa supervisa tur e lugarnan cu ta brinda cuido na adultonan mayor, y apunta adultonan mayor tambe den e comision aki.
- Cuido medico di calidad y adecua pa adultonan mayor en general, sin discriminacion di edad; Aruba tin mester di mas geriatra pa brinda e cuido di salud di calidad na nos adultonan mayor.
- Institui un procedura y apunta un comision pa atende cu casonan di abuso di adultonan mayor, tambe na hospital y aumenta castigo.
- Institui un Consejo di Adultonan Mayor ('Ouderenraad'), cu ta conseha Gobierno riba tur tema relaciona cu e problemanan y e bienestar di adultonan mayor den nos comunidad.
- Reduci e peso fiscal riba adulto mayor, eliminando belasting riba pensioen di biehes, y reduciendo e prima di AZV cu e pensionado mester paga por medio di un 'gliding scale', cual lo brinda beneficio financiero na esnan cu aparte di nan pensioen di biehes, tin otro entrada.
- Tuma pasonan necesario pa sigura continuidad di e fondo di Seguro di Biehes ('AOV'), cu ta e fuente di entrada principal di e gran mayoria di nos grandinan.
- Baha edad di pensioen te 62 aña, pa asina na un edad razonabel, nos grandinan por baha cu pensioen y gosa di un pensioen bon mercedi, pero pa esnan cu kier y por bay cu pensioen na un edad mas avansa di 65 aña, esaki tambe mester ta posibel. Flexibilidad di escogencia mester ta e meta, pero e derecho pa bay cu pensioen y ricibi e pensioen di biehes mester keda ancla den ley.
- Den departamentonan di gobierno, banconan, etc. crea fila separa pa adultonan mayor por haya ayudo cu preferencia.
- Aumenta concientizacion pa nos hobennan respeta nos adultonan mayor.

FINANSAS PUBLICO NOS PRIORIDAD PA ATENDE CU E CRISIS FINANCIERO

Aruba ta pasando den su peor crisis financiero den historia di nos pais. Durante e gobernacion 2009-2017 nos debe nacional a practicamente redobla di 49 % pa 87% di nos "GDP" y nos a conoce deficitnan den presupuestonan di mas grandi den nos historia, y den esaki no ta inclui e proyectonan PPP.



E problema mas serio ta cu Gobierno no ta transparente den publicacion di cifranan real, y no kier publica rapportnan. Tur instancia internacional manera IMF, S&P, Fitch y CAFT a muestra nan preocupacion cu e rumbo cu pais Aruba ta bayendo. Aruba a conoce un gobierno cu a goberna a base di fia placa y no tabata tin e habilidad di mantene e situacion financiero dentro di normanan sostenibel.

Resultado di esaki ta un supervision financiero forsa pa medio di ley.

Nos lo reestablece e autoridad y maneho independiente di Direccion di Finanzas y tur otro servicionan di gobierno.

Tur esaki den margen di leyman y conforme e presupuesto aproba pa Parlamento.

Gobierno lo haci uzo atrobe di tur su hefe di servicionan y institucionan como consehero pa loke ta maneho di gobierno.

Esaki lo limita mas tanto posibel servicio externo y contractonan caro pa nos pais. Maneho financiero mester ta basa riba e realidad y proyecta den presupuesto di Aruba.

Lo inventarisa e situacion real cu ta encera obligacionnan den futuro. Lo corta den gastonan cu no ta prioridad y cu no ta trece beneficio pa nos pueblo. Lo reduci e deficit di nos presupuesto gradualmente pa yega bek den un limite responsabel y manehabel.

Asina tambe limita e necesidad pa fia placa tur aña pa cera e deficit den presupuesto!

Conhuntamente cu un crecemento di nos economia (GDP) e esfuersonan aki lo traduci nan mes den un rebaho di e porcentahe di nos debe relata na nos GDP riba termino mediano y largo.

"MEP su vision riba tereno di finanzas publico ta pa pone e ser humano central. Decisionnan cu wordo tuma, lo wordo tuma teniendo e futuro di nos yiunan y nan yiunan den mente".

Den e maneho financiero nos lo demostra curashi y determinacion pa tuma decisionnan cu no por ser pospone mas.

Prioridadnan nobo lo ser estableci cu bista riba sostenibilidad di pais Aruba.

Maneho di finanzas publico lo regresa na ser transparente y responsabel.

Den e cuadro aki lo renegocia e normanan financiero estableci pa medio di ley y lo yega na normanan nobo dentro di un periodo responsabel cu lo no afecta e sostenibilidad di nos pueblo.

Caminda lo por haci ahustenan inmediato lo haci esaki y caminda cu tin mester di mas tempo pa yega na metanan comun lo mester yega na palabracionnan nobo.

STRATEGIA PA ATENDE PROBLEMANAN FINANCIERO DI ARUBA:

Den e prome 30 dia di gobernacion un comision di expertonan Financiero Economico di nos pais lo inventarisa e situacion financiero real di nos pais, y presenta nan rapport.

E RAPPORT LO CONTENE UN BISTA REAL DI:

1. Gastonan pendiente y debenan hereda di Gabinete Mike Eman 2009 – 2017.
2. E debenan total cu nos pais tin na banconan local, institutonan local y internacional, incluso obligacionnan riba termino largo.
3. Inventarisa y revisa tur contracto y nan consecuencia financiero pa pais Aruba firma durante 2009 – 2017.
4. Inventarisa y revisa tur inversion ehecuta of den ehecucion durante 2009 – 2017 y nan consecuencia financiero pa pais Aruba a largo plaso.
5. Defini y calcula e deficit financiero real den presupuesto 2017 y e añanan venidero.
6. Defini un plan realistico dentro di margen aceptabel internacionalmente, pa baha e debe publico.
7. Ahusta Presupuesto 2017, si ta necesario, pa gobierno por prepara e presupuesto supletorio 2017 y pa Parlamento trat'e na december 2017.
8. Hunto cu un team di experto nos lo fiha e normanan cu gobierno di MEP lo aplica den cuadro di un maneho financiero responsabel pa reduci e deficit den presupuesto y pa baha e debe nacional, teniendo cuenta cu norma y desaroyonan internacional pero mas aun teniendo cuenta cu e economia di nos pais. Algo similar na e rapport di National Committee on Public Finance (“NCPF”) cu a wordo publica na aña 2006. Den esaki lo pone enfasis pa sanea e situacion financiero di e fondonan di SVB, APFA y AZV.

A base di e inventarisacion, resultado y recomendacionnan lo cuminsa deliberacion cu gremionan, Parlamento y pueblo di Aruba, cu lo conduci na recomendacionnan pa defini prioridadnan y areanan di atencion urgente pa e prome aña di gobernacion:

- Refinancia nos debe den un forma cu e lo no bay afecta nos poder di compra, esta no cu medida, pero restructura e debe di nos pais cu nos plan di restauracion di estabilidad financiero, cual ta encera un prestamo na un interes bao di e interes cu nos ta pagando awor aki.
- Aplica un maneho di austeridad den gastonan di gobierno “top-down”; cambia e prioridadnan den gobernacion, bahando e gastonan innecesario mas tanto posibel.
- Aplica disciplina presupuestario, pa tene nos mes na e normanan pa loke ta trata e deficit den presupuesto y e debe nacional; e disciplina presupuestario lo refleha den entrega di presupuesto y cuentanan anual na tempo.
- Restructura sistema di impuesto y converti'e den uno mas senciyo, mas husto y mas moderno, den cual tur hende lo paga impuesto di acuerdo cu su entrada, sin privilegio. Un sistema den cual e ciudadano cu tin derecho di haya placa bek, lo hay'e mes lihe bek, cu ta ser spera di dje cu e mester paga otro impuesto y cu ta trece entrada pa gobierno na tempo. Un sistema cu ta crea e disciplina pa tur cu mester ta contribui y na tempo. Caminda cada ciudadano y empresa ta carga su responsabilidad.
- Un sistema cu ta pone enfasis riba e impuesto indirecto, reduciendo e impuestonan directo, y na mes momento implementa un sistema di control riguroso pa sigura cu tur contribuyente ta paga locual nan mester paga y dentro di e tempo cu nan mester paga.

Den esaki lo tin un atencion special pa nos pensionadonan, entre otro lo kita impuesto riba pensioen di biehes, pa asina reduci e peso di impuesto y reduci e prima di AZV cu nos pensionadonan mester paga.

- Un sistema di impuesto cu lo atrae inversionistanan serio, cu ta dispuesto pa contribui na caha di gobierno.
- Lo restructura Departamento di Impuesto y dun'e bek e lugar y e respet pa e por traha responsabel, eficiente, transparente y independiente manera cu ley ta prescribi.
- Lo sondea un sistema di restructuracion di e (HA)BRA pa asina bin cu un sistema na unda gastonan di personal por wordo maneha miho, acoplando esaki na productividad mas halto, pero na mes momento dunando e empleado publico locual e tin derecho riba dje.
- Nos lo maneha e gastonan publico na mes forma cu ta maneha gastonan den un hogar. Den momentonan di austeridad lo corta cu gastonan luhoso, entre presupuesto di viahe y fiestamento. Lo hala faha mara, pero lo cuminsa cerca gobernantenan y e gastonan publico prome.



Nos meta ta pa pone orden financiero den nos pais, y baha e debe cu tin riba lomba di nos yiunan y e futuro generacionnan.

NOS PRIORIDAD PA DESAROYO DI TURISMO

Ta obvio cu despues di e ciere di refineria Valero na 2012, e industria di turismo ta Aruba su unico pilar economico na e momentonan aki. Hopi esfuerso a wordo dirigi pa hisa cantidad di bishitantenan pero a perde e calidad di nos bishitantenan for di bista y poco atencion a wordo duna na evalua kico ta necesario pa cu e productividad di e industria aki mirando cu turismo na Aruba ta saturando. Aruba ta sinti esaki pa e echo cu menos placa ta keda atras mirando cu bishitantenan ta gastando menos placa mientras nan ta na Aruba y specialmente tur tendencia ta mustrand cu bishitantenan ta bin mas y mas cu paketenan prepaga y un cantidad significativo ya ta bin Aruba cu paketenan “All-inclusive”.



MEP lo no solamente concentra riba crecemento den cantidad pero tambe hisa e calidad di nos bishitantenan dirigiendo esfuerso pa atrae bishitantenan cu por gasta mas na Aruba.

Esaki ya ta bahando e rentabilidad di placa cu tin disponibel pa mercadea nos pais, cu ta mas cu dobel di añanan atras. A pesar cu e cantidad di “tourist stay-over” a crece, e crecemento aki no a traduci su mes den crecemento di GDP. Di otro banda, e cantidad di ‘calls’ di barconan crucero, y e cantidad di turistanan crucero a baha. E desaroyo aki ta preocupante y mester di mas atencion.

Mester duna mas atencion con pa yega na un miho mix di mercado cu Aruba lo atrae pa nos desvia nos dependencia riba algun mercado so, haciendo nos economia mas vulnerabel pa loke por pasa na e paisnan aki y nan economia. Ultimo cifranan ta mostra cu hasta nos bishitantenan di Merca ta concentra practicamente pa 75% riba e area Noroeste so di Merca.

Mirando cu awor tin mas fondo disponibel pa mercadeo y promocion, haci pa cada florin bal mas na e momento di inverti den mercadeo.

Aruba ta ser mira y categorisa como un destinacion caro den region. Mas cu mita di su bishitantenan mes ta indica esaki. Awor mas ainda mirando e medidanan fiscal cu a wordo introduci cu ta impuesto directamente riba e bishitantenan.

Otro area di preocupacion ta siguridat cu Aruba por ofrece su hendenan pero tambe su bishitantenan. Mas y mas ta registra casonan di robo y atake riba nos bishitantenan, cu por pone cu Aruba ta perde e imagen di ta un destinacion safe pa viaheronan.

STRATEGIA PA OPTIMALISA E EFECTIVIDAD MACRO-ECONOMICO DI E INDUSTRIA TURISTICO

- Dirigi esfuerso pa atrae bishitantenan di edad y di esnan cu ta gosa di mas entrada resultando den bishitantenan cu ta gasta mas den nos economia y desaroya diferente “niche” markets pa Aruba.
- Studia posibilidad di destinacion emergiendo relata na connexionnan aereo disponibel incluyendo paisnan den Europa y Latino Americano, specialmente Brasil.
- Stimula y atrae bishitantenan pa temporada abao pa no elimina fluctuacion drastico entre temporada halto y temporada abao.
- Promove y stimula posibilidadnan comercial turistico pa produci mas empleo y cupo di trabao nobo, y metodonan mas creativo y eficiente digital pa promove y mercadea Aruba, a base di comportacion y tendencianan di viahero cu mester ser studia na un manera structura pa realisa uzo di fondonan mas efectivo.
- Fortifica relacionnan cu agentenan di biahe cu ta duna e toke mas personalisa pa promove nos pais como destinacion.
- Reevalua medidanan fiscal directo y indirecto riba bishitantenan y su efecto riba e industria y relata na e imagen cu Aruba ta un destinacion caro.

- Impone medidanan di siguridad den areanan frecuente pa nos bishitantenan pa garantiza un miho siguridad, incluyendo mas of mihor iluminacion y uzo di camara di siguridad y vigilancia.

- Sondea e posibilidad di atraccion cu cada bario di Aruba tin di ofrece como producto turistico pa asina educa y informa nos bishitantenan di e producto y identidad di Aruba mas holistico.

- Tambe sondea e posibilidad di atraccion al estilo “theme-park” y crea incentivo pa posibel inversionista riba e tereno aki.

- Apoya y stimula productonan y actividadnan autentico local y cultural, manera pica di papaya, artesanía, grupo di baile folklórico, festivalnan, parke nacional Arikok, etc.

PROPOSICION PA MEHORA TURISMO CRUCERO

- Percura pa atrae mas linea crucero durante henter aña pa asina minimalisa y/of termina cu e fenomeno di off season.

- Estrecha nos lasonan cu tur compania y stakeholders den e industria di crucero, pa asina ta consciente di tur desaroyo di y den e mundo crucero.

- Promove Aruba como “home-port” y percura pa mehora e infraestructura den nos waf y pafor pa por garantiza nos empeño continuo di mehoracion di e producto Aruba.

- Pone enfasis riba calidad y no cantidad y enfoca riba upgrading di e producto turistico Aruba.


- Drecha y crea atraccionnan turistico.

Nos prioridad ta un turismo fuerte y sostenibel

Nos lo lucha pa mantene e producto-turistico Aruba na un nivel di calidad y haci e industria aki mas productivo y rentabel, mirando su estado di saturacion na e momentonan aki. Mester pone enfasis riba calidad y no cantidad y enfoca riba upgrading di e producto turistico Aruba. Drecha y crea atraccionnan turistico. Mester rejuvenece y reinventa e producto turistico.

NOS PRIORIDAD PA UN MANEHO DI ENERGIA SOSTENIBEL

Aruba mescos cu resto di mundo den e ultimo añanan a busca alternativa pa energia cu ta depende di petroleo. Na aña 2004 nos compania di utilidad WEB NV a inicia un proyecto pa baha e dependencia riba fuel oil, e proyecto innovativo di 'Reverse Osmosis' pa produci awa y e generadornan RECIP pa produci coriente.



Mientras tanto mas y mas estudio ta indica cu molina di biento por causa problema na salud di hende. P'esey partido MEP a bay en busca di diferente alternativa cu no ta afecta salud di hende, y no ta causa un impacto negativo riba medio ambiente. Pero principalmente, pagabel pa cada ciudadano. E realidad cu nos ta biba aden ta cu tin un cantidad grandi di persona ta biba sin coriente, debi cu costo di bida a aumenta demasiado.

PROPOSICION PA RESOLVE PROBLEMANAN ENERGETICO ACTUAL

- Introduci un areglo social real pa tur cu ta den necesidad, specialmente esnan cu ta biba di onderstand.
- Introduci reverse meter pa cu coriente pa reduci asina gastonan di uzo di coriente na unda e habitante cu por inverti den electricidad di su mesun cas, ELMAR lo por cumpra esaki bek door di e reverse meter.
- Haci investigacion cual ta e 'mix' di diferente forma di energia alternativo cu ta funciona optimalmente pa Aruba. Na momento di busca forman di energia alternativo, tin dos punto di salida crucial pa tene cuenta cu ne:
 1. E forma di energia alternativo mester reduci gastonan di awa y coriente inmediatamente.
 2. E forma di energia alternativo cu nos scoge no por tin un impacto negativo riba nos comunidad.

Banda di esaki nos mester acelera y adelanta e proyecto di gasoducto, plantia pa gobierno di MEP na aña 2009, pa WEB y e refineria di Aruba cu mester habri ainda, por haya gas natural for di e pos di REPSOL cu ta solamente 50 kilometro leu di Aruba.

MEP ta convenci cu e solucionnan aki ta esnan mas sostenibel, mirando cu e ta un forma di energia limpi, y na mes momento ta pagabel pa cada ciudadano, y pues sostenibel.

Cu esaki MEP lo logra reduci costo di bida. Energia alternativo ta keda riba agenda di gobierno semper y cuando cu esaki ta na beneficio di pueblo y sin consecuencia negativo pa nos medio ambiente.

NOS PRIORIDAD PA INFRASTRUCTURA Y MEDIO AMBIENTE

Un di e basenan importante pa un desaroyo economico social duradero ta bo condicion di infraestructura fisico of teritorial. Un calidad halto di bo infraestructura fisico ta un condicion vital cu ta sirbi pa eleva un calidad di bida halto pa nos pueblo den futuro, mirando cu como isla nos areanan espacial ta limita y nos desaroyo economico, social, demografico a pone hopi presion riba e parti fisico di nos isla.

Nos partido a introduci den añanan anterior e ley di Ordenansa Teritorial di Espacio.

Cu e introduccion di e ley aki nos a enfoca e problemanan fisico den forma integral y multidisciplinario. Den e ley aki a bini cu un plan di ordenansa teritorial cu a stipula unda por permiti actividad economico, unda ta traha cas, unda ta proteha naturalesa, unda por traha hotel y cual beachnan mester wordo proteha. Den e plan aki a purba di haya un balance entre actividad economico, social y espacial.



Lastimamente durante añanan cu a pasa e gobierno actual no a sigui traha riba e ley aki na unda ta stipula cu mester bin tambe cu plannan detaya pa areanan di Aruba.

Meta di e vision di MEP ta pa evita actividadnan conflictivo den bario. Pa por logra esaki lo mester ekipa y optimalisa tur e departamentonan cu ta di importancia pa logra esaki.

Den e maneho nobo di nos partido pa añanan 2017-2021, nos lo tuma como punto di salida un maneho duradero den tur e areanan cu tin relacion cu nos maneho teritorial y infraestructura.

Pa e area di centro di ciudad di San Nicolas nos tin e firme proposito pa concentra actividadnan comercial den e parti mas pabao di Mainstreet pa crea un ambiente sano, caminda famianan kier bishita, keiro y haci compras, y separa e area aki di e area di e barnan, mientras ta busca un solucion duradero pa e situacion aki.

Finalmente, maneho di partido MEP ta dirigi den baha gastonan di operacion di gobierno, y lo continua cu e plan cu a inicia durante Gabinete Oduber pa construi edificionan di Gobierno pa ubica departamentonan di gobierno, y asina ta menos dependiente di huurmento di edificio.

PROPOSICION PA E PROBLEMA DI ORDENANSA TERITORIAL Y OTORGAMENTO DI TERENO

- Fortifica e departamentonan cu ta trata cu infraestructura y nan personal; ekipa e departamentonan pa por analisa y adapta e plan di teritorio espacial den cuadro di un desaroyo sostenibel.
- Finalisa e asina yama 'bestemmingsplan' of e plan di desaroyo pa distrito cu instruccionnan pa tur e regionnan manera cu ley ta prescribi.
- Adapta y introduci un maneho pa otorgamento di tereno mas efectivo y transparente pa e ciudadano, teniendo na cuenta cu nos espacio pa duna tereno ta limita.
- Ekipa Directie Landmeetkunde en Vastgoedregistratie (Kadaster) pa por midi terenonan publico y priva mas liher. Optimalisa e registro di Kadaster den forma digital.
- Lo reafirma pa medio di un ley cu e area den vecindario di Alto Vista/Urirama ta area destina pa naturalesa, y no haci'e un parke di molina di biento.



PLAN DI ACCION PA EDIFICIONAN DI GOBIERNO:

MEP lo continua cu e plan di construi edificionan propio di gobierno pa asina, riba termino largo, no mester depende di huur edificio pa departamentonan di gobierno y pues baha e gastonan di huur. Tur contracto di huur of prolongacion di contracto di huur lo pasa via un destaho publico y transparente.

OBHETIVO PA CU PRIORIDAD DI MANEHO DI CARETERA Y INFRAESTRUCTURA

- Cu partido MEP den gobernacion lo traha cu un presupuesto tur aña pa mantencion di caminda asfalta den tur bario y pone y mantene iluminacion tur aña den diferente bario.
- Lo construi mas caminda pa por core bicicleta, y pa hende por cana.
- Drechamento di riolering den barionan na unda tin necesidad.
- Habri mas plan di parcelacion particular pa stimula nos economia.
- Piernan den mal condicion lo wordo renoba y piernan nobo lo wordo construi.
- Edificionan di Gobierno lo wordo sometí na un programa riguroso di mantencion.
- Stimula contratistanan local pa participa na momento di otorga obra di carretera y edificio, dunando preferencia na companianan estableci na Aruba, y mester introduci criterio cla pa drechamento di carretera a base di WIF. Na e momentonan aki gobierno no ta aplica e ley pa destaho publico pa proyectonan di obranan publico manera mester ta. MEP si lo cumpli cu e ley aki.

- Elimina “ARUPARKING” y encarga e personal cu control di parkeo debido y conforme ley den ciudad, bao di Cuerpo Policial mientras e resto di personal lo keda incorpora den Cuerpo Especial Arubano (CEA).

Alabes lo habri Caya Betico Croes bek pa trafico y tur e hanchinan unda mas o menos 400 lugar di parkeo a ser elimina, mester crea parkeo bek.





PROPOSICION PA CU PRIORIDAD DI MANEHO DI SUSHI Y MEDIO AMBIENTE

- Introduci leyman di medio ambiente, den cua ta stipula con realmente lo preserva nos naturalesa, y cu lo impone multanan severo contra esnan cu ta destrui nos naturalesa.
- Introduci un maneho di sushi efectivo, cu lo atende cu e dump di Parkietenbos, dumpnan ilegal, y sushi rond Aruba; bin cu campaña di concientisacion pa haci nos cuidadanonan conciente cu ta hunto nos mester tene Aruba limpi

NOS SOLUCION PA E PROBLEMA DI DUMP:

- Lo para e kimamento di sushi riba Dump inmediatamente y busca otro alternativa. Pa logra esaki lo haci e tratamiento necesario na e 'sero' di sushi pa evita cu explosionnan sigui causa candela y molester di huma.
- Lo drecha e planta di procesamiento di sushi pa por procesa e sushi cu ta drenta dump riba base diario; si ta necesario lo amplia e capacidad.
- Riba termino largo lo procesa e sushi cu ta riba e terreno di dump actualmente y cu ta den violacion cu reglanan internacional di e haltura permisible di sero di sushi, y baha e sero.

Si mester di mas planta pa procesa sushi, lo establece otro area special den coordinacion cu organisacionnan riba terreno di medio ambiente, pa deshaci di sushi, pero cu na e mesun momento ta desaroya/produsi energia pa bende esaki cu Citgo y WEB Aruba NV.

Tambe lo evalua e posibilidad di exporta e sushi (incluyendo tur e autonan bieu) pa paisnan den region cu ta interesa den esaki. Asina nos lo soluciona e problema di Dump na Parkietenbos.

Esaki lo sosode basa riba e modelo cu ta ser uza na Finlandia, na unda solamente 1% di tur sushi ta bay Dump, tur resto lo mester produci energia of ta ser recicla. E Dump existente lo keda sanea y e candela lo paga pa semper.

- Profesionalisa Serlimar y elimina influencia politico.

- Introduci maneho nobo di medio ambiente y pa logra esaki mester activa y implementa leyman nobo y existente relaciona cu limpieza y conservacion di medio ambiente di nos pais, incluyendo maneho pa elimina autonan bandona, higiena rond di cada cas y sancionnan pa esnan cu ta viola esakinan.

Den e leyman concerni lo inclui un penalizacion di "Dump" ilegal y castigonan halto pa esnan cu ta tira sushi na canto di caminda.

PROPOSICION PA CU PRIORIDAD DI MANEHO DI VIVIENDA Y HUUR

- Debi cu gobierno no a traha cas di pueblo, mester pone tereno disponibel y cuminsa traha cas di pueblo urgentemente pa esnan di mas necesidad.
- Lo busca formanan di fianza na interesnan abao riba mercado Europeo pa destina esaki pa construccion di vivienda social.

OBHETIVO PA CU PRIORIDAD PA PLATAFORMA DI DESAROYO DURADERO

- Introduci un comision cu lo supervisa tur e departamentonan di infraestructura pa yuda nan pone enfasis riba un desaroyo sostenibel.

Participantenan ta consisti di comercio, universidad y expertonan riba e terreno concerni.

“Nos ta kere den un maneho di infraestructura sostenibel, poniendo e necesidadnan di e ser humano central”.

NOS PRIORIDAD PA UN TRANSPORTE Y COMUNICACION CONFIABEL

Transporte publico ta keda un tarea di gobierno. Esaki pa garantisar medio di transporte publico eficiente y confiabel pa pueblo. Mirando cu e costonan di transporte ta influencia costo di bida, ta nos compromiso pa busca alternativanan pa e gastonan di transporte.

Un transporte publico confiabel riba termino largo lo soluciona e problema di congestionamento den trafico debi cu tin hopi auto na Aruba. Pa logra esaki mester amplia e rutanen, mester tene e gastonan pagabel, y mester brinda esnan cu tin un entrada menos cu minimum loon, e oportunidad pa transporte publico gratis, of na prijs hopi reduci. Asina tambe mester mehora e servicio na nos waf y aeropuerto, pa garantisar un transporte confiabel.

OBHETIVO PA UN TRANSPORTE MAS CONFIABEL

- Stimula e registro di avionnan, bao di e mesun tipo di condicion, y cera mas acuerdo bilateral pa por registra mas avion y crea mas entrada.
- Stimula y incentiva creacion na Aruba di un “Commuter Airline” pa transporte entre otro e islanan di Reino Hulandes cu avion chikito [nobo y leased], cu no tin intencion di bay bula rond di mundo cu avion grandi, pero ta focus riba nos region y rutanen cu a demostra di ta genera entrada.
- Cambionan realisa den Arubus NV ultimo tempo lo ser evalua y unda cu mester lo keda corigir na bienestar di pueblo pa percura pa mehora e transporte publico di parti di Arubus y autobusnan.

- Lo evalua henter e maneho di transporte publico pa loke ta trata maneho, eficiencia y control di permiso a base di un ‘mobiliteitsplan’ integral, moderno y transparente.
- Introduci transporte liber pa esnan cu ta biba di onderstand y studiantenan di menos recurso.
- Mehora servicio di nos wafnan y aeropuerto. Mester habri nos Waf na Playa (Oranjestad) bek pa importacion di carga [chikito/roll-on-roll off]. Den cooperacion cu nos partnernan den Reino Hulandes nos mester habri e mercado di transporte maritimo y busca manera pa importa producto for di otro sitionan (area portuario) na Estados Unidos, pero tambe for di Colombia, Panama, Republica Dominicana.



PROPOSICION PA COMUNICACION MAS CONFIABEL

- Optimaliza conexion di internet, y haci esaki mas rapido.
- Percura pa tur scol haya internet por nada (free-WIFI).
- Construi un “Centro Digital” den area di scolnan na San Nicolas, pa tur alumno por haya conexion di internet y na mundo digital gratis, specialmente despues di scol. E centro aki lo ta habri pa tur hende cu talbes pa motibonan di recurso no tin acceso na computer y internet na nan cas.
- Introduci un ‘Media wet’ pa garantisar obhetividad di medionan di comunicacion na Aruba.

NOS PRIORIDAD PA ENGRANDECE NOS CULTURA

Historia y cultura ta un yabi pa desaroyo sostenibel di un pais. Ultimo añanan nos a mira un tendencia peligroso pa cambia historia di nos pais, specialmente pa cu e lucha pa nos Status Aparte. Gobierno di MEP lo institui un Comision Nacional cu amplio representacion pa publica e historia real riba base cientifico, cu lo wordo incorpora den curiculo na nos scolnan. Tur pais desaroya y mayoria pais cu tin turismo como un di su pilarnan principal di economia, tin un plan nacional di cultura bon stipula. Aruba tambe tin su plan nacional di cultura desde 2006 caba, yama 'Integraal cultuurbeleidsplan'. MEP lo sigui implementa nos plan nacional di cultura manera tabata e caso te cu 2009.



Nos meta ta pa hobennan haya oportunidad pa participa gratis riba un escala grandi na actividadnan cultural, pa asina desaroya nan habilidad y talento riba tereno di arte y cultura. Y pa asina logra un pueblo feliz cu tin un satisfaccion grandi di sa kico ta nos identidad, nos idioma, nos cultura y nos historia.

PROPOSICION PA ELEVA E CALIDAD Y DESAROYO DI NOS PRODUCTO CULTURAL

- Promove actividadnan cultural den tur skina di Aruba pa conscientisa nos pueblo cu nos cultura y identidad ta primordial, pa nos kere den nos mes y pa nos por sigui progresa como hende.
- Tene cuenta cu nos comunidad multicultural y duna oportunidad pa cera conoci tambe cu e cultura di e diferente paisnan cu un representacion na Aruba.
- Envolve henter nos comunidad multicultural, pa participacion di hoben y adulto den e proceso di cultura, sin importa nacionalidad y duna instancianan cu tin e tarea y responsabilidad pa desaroyo di cultura, un sosten financiero relevante, pa yuda implementa e maneho cultural di Aruba.
- Instala un Consejo di Cultura (Raad van Cultuur) cu mester revisa implementacion di e maneho cultural y duna feedback na Ministro di Cultura, Departamento di Cultura y directiva di organisacionnan gubernamental y no-gubernamental.
- Stimula instancianan cultural (e.o. museonan, parke nacional etc.), artista y artesanonan pa alcanza un producto cultural-turistico a base di identidad propio y cu un calidad di produccion na nivel internacional.



- Planea y ehecuta mas investigacion riba tereno di cultura pa por mehora e calidad y e producto cultural.
- Duna atencion na e Dianan Internacional riba tereno di Cultura y Naturalesa, y pone mas enfasis na nos fiestanan cultural nacional, cuminsando na scol.
- Introduci den e centronan di bario, un sistema di actividadnan cultural cu guia special pa hoben, tambe pa tin espacio pa artistanan cu experiencia y expertonan local, regional y internacional traha cu hobennan den proyectonan despues di scol, manera e proyectonan Arte di Palabra y Gang di Arte.
- Garantisa continuacion di iniciativanan particular, por ehempel Festival di Dande, Festival di Himno y Bandera, Fiesta di San Juan Dera Gay etc.
- Amplia e sosten profesional dirigi mas riba e necesidad di nos Centronan di Bario, Clubnan den bario y otro grupo y instancianan cultural.
- Introduccion di dianan di distrito, a base di un estudio pa fiha e fecha conmemorativo pa cada distrito, y lo wordo celebra cu actividadnan recreativo popular y cu manifestacion cultural.
- Institui un Comision Nacional cu amplio representacion pa publica e historia di pais Aruba, specialmente e lucha pa nos Status Aparte, riba base cientifico, cu lo wordo incorpora den curiculo na nos scolnan.

**“Historia y cultura ta un yabi
pa desaroyo sostenibel di un pais.
MEP lo sigui implementa nos
Plan Nacional di Cultura”**

NOS PRIORIDAD PA UN BON RELACION DEN REINO Y COOPERACION INTERNACIONAL

Desde 1986 cu pais Aruba a logra su Status Aparte y despues na 1996 a anula e fecha di independencia for di Statuut di Reino, e pueblo di Aruba den su mayoria ta na favor pa Aruba keda forma parti di Reino Hulandes. E relacion y aprecio di nos pueblo pa cu e famia di Cas Real, e pueblonan di Hulanda, Corsou, Sint Maarten y islanan BES lo keda e vinculo pa nos sigui traha cu otro den Reino Hulandes.



Den e ultimo 8 añanan, partido MEP a sa di surpasa e distanciamiento cu por tabata existi entre e partido y cierto politiconan Hulandes.

Partido MEP awe ta gosa di respet grandi di politiconan Hulandes como tambe di politiconan di Corsou, Boneiro y Sint Maarten.

E brughan cu a wordo construi a convence Hulanda cu partido MEP ta un partner serio den Reino y cu mester tene cuenta cu n'e.

Partido MEP den historia politico di nos pais a hunga un rol grandi den realisa y construi pais Aruba autonomo den Reino Hulandes.

MEP ta kere den un bon relacion den Reino, basa riba madures y respet mutuo.

E tarea di MEP tanto den gobierno como den Parlamento semper lo ta pa cuida nos derechonan adkiri, e status Autonomo, dignidad y interesnan di nos pueblo.

Den nos relacion cu Reino, Statuut ta brinda suficiente espacio pa sigui traha cu otro den Reino a base di respet, den forma constructivo cu e pensamiento pa hiba nos pais y Reino Hulandes padilanti.

Respet ta tambe tene cuenta cu e realidad di nos limitenan y nos posicion geografico y situacion geopolitico di nos region.

Finalmente respet kiermen tambe brinda e espacio pa nos pais por emancipa, crece y sigui desaroya.

PARTIDO MEP TA KERE DEN UN BON RELACION DEN REINO, BASA RIBA TRES PRINCIPIO FUNDAMENTAL:

1. Un relacion a base di respet mutuo, principalmente respetando nos autonomia.
2. Un relacion a base di madures.
3. Un relacion na unda cu por nos ta traha cu otro, sostene otro y coopera cu otro tur caminda cu ta posibel den relacionnan internacional.



PRIORIDAD PA UN BON RELACION DEN REINO Y APOYO RIBA TERENO INTERNACIONAL

Traha cu demas partnernan den Reino a base di cooperacion mutuo, y caminda cu ta posible encamina proyectonan hunto, pa un yuda otro, manera por ta e caso cu e proyecto di e hidro kabel y gasoducto, cu por beneficia e islanan di Corsou y Boneiro tambe.

Traha mas cu e otro islanan riba tereno di Justicia, Aviacion Civil, Transporte Maritimo, Cuido Medico, Enseñansa, Servicio di Inmigracion y Aduana, evalua e posibilidad di un Union Aduanero.

- Den e prome seis lunanan di gobernacion nos lo plantea un maneho di admision hopi mas flexibel pa nos conciudadanonan di nacionalidad Hulandes, sin importa di unda nan a bini ni na nunda nan a nace. Lo adapta nos leynan aplicabel di tal forma cu nos ta crea uniformidad mas tanto cu ta posibel cu e legislacion encuantra admision existente na Corsou, St.Maarten y e islanan BES.
- Traha a base di transparencia, na solucionacion nos propio problemanan sin tin cu bay bati na porta di Hulanda pa solucionacion tur problema.
- Exigi den Reino e respet necesario pa nos autonomia, y pa e derechonan di nos ciudadanonan.
- Mester sigui conduci e relacionnan den Reino basa riba respet mutuo y cooperacion voluntario.
- Nos lo habri e dialogo cu nos partnernan den Reino Hulandes pa cambia e ley riba nacionalidad Hulandes bek na lo cual e tabata ta prome cu e palabracion haci na comienso di 2010, cual tabatin como consecuencia cu pa haya nacionalidad di Reino Hulandes, papia y domina e lengua Hulandes a bira rekisito primordial. MEP a boga pa e ciudadano por a scoge of Papiamentu of Hulandes of Ingles of Fries, cual nan tur ta lenguanan oficial reconoci den Reino Hulandes.
- Ta importante pa mas lihe posibel activa atrobe e Consejo di Cooperacion Ministerial (MSR) cu Corsou y St.Maarten.
- E gobierno actual a crea un “Bureau Europees Zaken” y saca e maneho geopolitico y juridico pa cu Comunidad Europeo for di Departamento di Relacion Exterior y e maneho di desaroyo y cooperacion economico for di Departamento di Asunto Economico y Industria.

Consecuencia di esaki ta entre otro cu Aruba a perde participacion den e ultimo fondonan di desaroyo (EOF- fondsen) di Comunidad Europeo. Esaki mester ser coregi inmediatamente.

- Den cooperacion cu nos partnernan den Reino nos mester trata di yega na un maneho y acercamiento comun den relacion cu nos paisnan bisiña manera Colombia y Venezuela. Un relacion maritimo mas estrecho cu Panama pa baha gasto di importacion.

Nos mester cuminsa participa atrobe den encuentro nan regional riba tereno di salud publico, labor, energia, turismo, deporte, educacion, transporte maritimo y aviacion, pa a base di esfuerso mutuo por yega na progreso y bienestar di nos ciudadania.

Sin embargo mester minimisa gasto y evita viahe sin ningun resultado positivo pa pais Aruba manera e biahamento pa loco di gobernacion actual.

“MEP ta kere den Aruba como parti di Reino, cu un bon relacion den Reino, cu respet pa nos Status Autonomo y e voluntad mutuo pa coopera cu otro. Alabes nos kier mira un Aruba cu tin tur posibilidad pa desaroya economicamente y financieramente, a base di su propio esfuersonan den relacionnan internacional”.



16

NOS PRIORIDAD PA UN GOBERNACION MAS TRANSPARENTE

Aruba merece un gobierno integro, di gobernantenan cu ta bisa loke nan ta haci y ta haci loke nan ta bisa. Contrario na lo cual Aruba a conoce ultimo añanan na casonan di corrupcion. Nos kier un gobierno liber di corrupcion, y un maneho publico mas transparente y etico, caminda lo cumpli cu regla y leynan vigente.

Reglanan di destaho publico lo keda enforza. Mester atende cu corrupcion den actonan di gobernacion, cu man duro y cu transparencia. Ta asina so nos lo logra pa reforsa e legitimidad di e institucionnan publico.



*Marcando **Historia.***

OBHETIVO PA CREA MAS TRANSPARENCIA DEN GOBERNACION Y RESPET PA INSTITUTONAN DEMOCRATICO:

- Evalua reglanan relaciona cu destaho publico pa por elimina cualkier ‘loophole’ cu ta existi den su aplicacion. Gobierno di MEP lo cumpli cu e reglanan aki sin excepcion.
- Introduci un codigo di etica cu lo dicta e relacion entre Gobierno y Parlamento caminda cu lo bay eherce nan trabao na un manera profesional, digno y cu respet pa pueblo di Aruba. Den esaki e Presidente di Parlamento tin un tarea importante pa guia y dirigi nos Parlamento den forma y etica adecuado. Lo aplica un maneho di un democracia bibo, transparente, participativo y neutral.
- Hisa e nivel di debate den Parlamento pa medio di regla den reglamento di orden di Parlamento cu e Ministernan tambe lo ta mara na un limite di tempo, y mester tene nan mes na e topico di debate.
- Introduci un reunion regular entre e Prome Ministro di Aruba y e lider di oposicion, pa toca temanan di importancia pa henter Aruba.
- Ekipa Centraal Bureau voor de Statistiek cu suficiente material, personal y autoridad pa eherce e funcion cu Centraal Plan Bureau tin na Hulanda, pa por controla proyectonan, compromisonan. Pues reinstitui e departamento cu tareanan adicional como “Centraal Bureau voor Statistiek en Planning”.
- Elimina influencia politico di e proceso di nombracion di personal di gobierno.
- Introduci metodonan di evaluacion obhetivo prome cu un promocion, y un “functiehuis” pa tur departamento di gobierno.
- Pone INTEGRIDAD como un prioridad den ehecucion di e maneho di cada Ministro, Parlamento y pa cada departamento di gobierno.
- Transparencia y combatimento di corrupcion. Corrupcion ta haci un pais pover y ta stroba su desarrollo.
- Lo introduci un comision di integridad cu mester señala, investiga y atende cu tur forma di mal uso di poder, fondonan publico, practicanan corruptivo, privilegio, conflictonan di interes den gobernacion. E comision di integridad, mescos cu defensor di pueblo, lo funciona independiente di gobierno.
- Nos lo aumenta concientizacion den e aparato gubernamental con pa detecta casonan corruptivo, y stipula un ‘meldcode’ con pa denuncia nan, teniendo na cuenta e proteccion pa e empleado publico



PLAN PA RECOPRA INTEGRIDAD DEN GOBERNACION Y PARTICIPACION MAS ACTIVO DI PUEBLO DEN GOBERNACION

● LEY DI FINANCIAMENTO DI PARTIDONAN POLITICO:

E ley di financiamiento di partidonan politico, lo evita cu placa di baho mundo ta wordo uza pa hiba campaña electoral, y evita cu baho mundo ta bin cobra fabornan bek, y ta mete den decisionnan di gobierno.

● INTEGRITEITSKAMER:

Den termino di e prome aña di gobernacion mester introduci un “Integriteitskamer” na Raad van Advies pa garantiza e integridad di gobernantenan, y un departamento “Contentieux”, cu por evalua y revisa casonan cu a bay LAR, pero cu despues gobierno a pone e consehonan di LAR un banda. Bon gobernacion y integridad den gobernacion mester sali for di e persona mes y en principio no mester ta necesario pa regle den ley, sin embargo pa evita e mal-gobernacion y corrupcion cu a tuma lugar e ultimo añanan, y pa restablece e confianza di e ciudadano den e gobierno, mester regla e asunto aki pa medio di un ley pa Aruba por tin un institucion independiente di gobierno cu por scrutina actonan di gobernantenan y/o departamentonan di gobierno ora mal gobernacion y corrupcion ta obvio.

● SCREENING DI MINISTERNAN:

E forma con ta screen ministernan mester wordo mehora, y mester duna Gobernador un papel mas crucial den screening di gobernantenan.

● CODIGO DI CONDUCTA:

Lo bin cu unCodigo di Conducta pa ministro y parlamentarionan pa asina evita cualquier impresion cu un ministro ta paga fabornan politico na esnan cu a financia su campaña.

Mester bini cu Control estricto riba integridad di gobernantenan y den caso di posibel violacion di ley, ministerio publico mester investiga e gobernantenan

● CAMBIA E ‘KIESVERORDENING’ pa permiti e politico cu mas voto drenta Parlamento irrespecto e number riba lista. Tambe pa elimina pa medio di un ley, e posibilidad di robo di asiento.

● OMBUDSMAN:

E ley di Ombudsman lo wordo introduci pa asina tin un defensor di pueblo, pa garantiza proteccion riba tur nivel. Un Ombudsman lo atende cu kehonan di ciudadanonan riba desicionnan inadecuado, mal motiva of sin base legal, tambe mal servicio di departamentonan gubernamental, pero tambe actuacion no integro di gobernantenan.

E ley aki, acompaña pa uno di ‘klokkenluiders regeling’, mester brinda proteccion na esnan cu ta denuncia corrupcin den gobierno, pa nan no wordo persigi.

● CORTE CONSTITUCIONAL.

Evalua e posibel creacion di un Corte Constitucional cu ta fortifica nos sistema democratico pasobra e ta introduci “checks and balance” haciendo posibel pa somete kualquier ley y decision na prueba di nos Constitucion.

Cu esaki ta preveni cu e mayoria den Parlamento of Gobierno por bin cu desicionnan cu ta contra di nos Constitucion cu tey pa netamente proteha e ciudadano. Democracia no ta ‘mayoria ta manda’. Democracia ta ensera cu kualquier mayoria cu ta na mando mester tene cuenta cu su minorianan.

● DEMOCRACIA INTERACTIVO.

E avansenan tecnologico ta amplia e posibilidadnan pa gobernacion yega mas lihe y facil cerca pueblo. Informacion confiable ta un condicion pa no solamente informa, pero haci hende consiente, activo y critico.

Mester amplia e posibilidadnan digital no solamente pa mehora servicio, pero pa ta mas conecta cu pueblo y pa pueblo ta mas envolvi den tumamento di decision cu ta toca nan.

● INICIATIVA DI PUEBLO.

Mester crea e posibilidad pa via di un iniciativa di pueblo trece un tema riba agenda di Parlamento ora cu pa un of otro razon Miembronan di Staten nenga pa haci’e. Aki ta trata di un tema cu ta sostene pa un petition firma pa suficiente hende, bon argumenta y na interes general. Nos no ta kere cu ta solamente Miembronan di Parlamento y Gobierno mester decidi cual tema ta keda discuti, sino pueblo en general.



mep

**Partido MEP ta invita bo pa hunto nos traha pa crea
un miho futuro pa nos yiunan y nan yiunan.**

Hunto nos lo haci e diferencia pa un miho Aruba.

Ban hunto p'e cambio.

#SINMIEDO





1

**EVELYNA C.
WEVER-CROES**



2

**XIOMARA J.
RUIZ-MADURO**



3

**CRISPIN V.J.
ROMERO**



4

**DANGUILLAUME P.
ODUBER**



5

**GLENBERT F.
CROES**



6

**GUILLFRED F.
BESARIL**



7

**HENDRIK W.G.
TEVREDEN**



8

**ROCCO G.C.
TJON**



9

**DAPHNE R.Y.
LEJUEZ**



10

**EDGARD G.A.
VROLIJK**



11

**ENDY J.H.
CROES**



12

**SHAILINY M.
TROMP LEE**



13

**JUAN E.
THIJSEN**



14

**LOUISETTE J.
CHRISTIAANS-
YARZAGARAY**



15

**SUEANN S.J.
RAS**




16

**LUIGI D.
BERGEN**



17

**DARLAINE B.
GUEDEZ-
ERASMUS**



18

**SHARLENE R.N.C.
STARKE**



19

**KAREL A.J.
MADURO**



20

**JOE G.
KOOLMAN**



21

**STEPHANIE M.
CROES**



22

**EDMOND L.
PARIS**



23

**JEREMH M.L.
CAMPBELL**



24

**AMY P.
RICHARDS**



25

**RUDY R.
RICHARDSON**



26

**REINWALD R.
RODERICH LOPEZ**



27

**KAREL CORNELIS
JEANDOR**



28

**CARLOS V.
JACOBS**



29

**ARTHUR
VALLEJO**

LISTA CANDIDATO

MOVIMIENTO ELECTORAL DI PUEBLO
ELECCION 2017